

ROMA PUIBLUPI CRISTOWA TUKUSKAKUNATA SAN PABLO KARTA KACHASKAMANDA

- 1** ¹Nuka, Jesucristopa lutrinsinami kani. Taita Dios agllaska kachamuskami kani, paimanda Alli Willaita willaspa puringapa. ²Santu Ispirituwa rimagkunawami ñugpamanda librupi niska karka, chi Alli Willaita willagsamungapa. ³⁻⁴Chi Alli Willaiwami ninchi, nukanchipa Iaia Jesucristo, sutipa Taita Diospa wambra kagta. Pai Jesucristo runa tukuskapa, atun mandag Davidmi paipa ñugpamanda achala taita kapurka. Pai wañuskataka, Taita Dios kikinmi, Santu Ispirituwa iapa iachaiwa kaugsachispa, kawachirka paipa wambra kagta. ⁵Taita Diosmi, Jesucristowa nukanchita iapa kuiaspa, agllaspa kacharka, Alli Willaita willaspa puringapa; chasaka tukui puiblu niraiaskakunamanda kaugsagkuna, paimanda uiaspa, paiwa suma iuiarispa, pai ima niskata ruraspa kaugsangapa. ⁶Kamkunapas chasallata agllaskakunami kangichi, Jesucristopa kangapa.
- ⁷Romapi kaugsanakuskatami kai karta kachaikichita. Tukui kamkunata, Taita Dios iapa kuiaspa agllarkami, paimandalla kaugsangapa. Nukanchipa Taita Dios i Iaia Jesucristo, kamkunata kuiaspa, suma iuiaiwa kawapuachu.

San Pablo, Romama chaiagringapa munakuskamanda

⁸Kamkuna Jesucristowa suma iuiarigkuna kaskamanda, tukui alpapimi iacharí. Chimandami, tukuimanda ñugpa, tukui kamkunamanda nukapa Taita Diusta: “Pai Siñur” nini, Jesucristota iuiarispa. ⁹Taita Dios ima niskata nuka tukui iuiaiwa ruraspa, paipa wambramanda Alli Willaita willagmi kani; paimi iachá, nuka kamkunamanda paita mana kungaris palla mañakugta. ¹⁰Paitami tukuipi mañakuni, pai munagpika, nuka imasapas

kamkunapagma chaiagringapa. ¹¹Iapami munanakuikichita kawagringapa; *chiwanka, Santu Ispirituwa imapas kamkunata karaspa, tukuipi allilla charingapakunata. ¹²Chasallata, nuka kamkunawa, Jesucristowa iuiagkuna kagmanda, parijuma sumaglla iuiachinakungapami kagringapa munakuni.

¹³Taitakuna i mamakuna, nuka munanimi, kamkuna kasa iachangapa: achka biajimi nuka munakurkani, kamkunapagma chaiagringapa. Chasa munakuspapas, imamandachar arkarispa, kunankama manara pudiriwá ringapa. Kamkunawa kagrispa, munakunimi, achka runakuna manara Cristowa tukuskakunata tandachingapa, paimandalla kangapakuna; imasami sug alpakunapi rurarkani: chasallata. ¹⁴Chaiawakumi, tukuipi griegokunata i augkakunata Alli Willaita willagringapa. Chasallata iachagkunata i ñi ima mana iachagkunatapas Alli Willaita willagringapami chaiawaku. ¹⁵Chimandami munakuni, nukanchipa Taitiku chasa munagpika, kamkuna Romapi kaugsanakuskatapas Alli Willaita willagringapa.

Alli Willaita uiaspa suma iuiarigkuna kispiringapa pudiskamanda

¹⁶Nukata ñi imapi mana manchawanchu, Alli Willaita willaspa puringapa. Tukui chita uiaspa suma iuiarigkunata, Taita Diosmi pudí kispichingapa. Ñugpa, judiukuna; nispaka, mana judíu kagkunapasmi pudinkuna kispichii tukunga. ¹⁷Chi Alli Willaipi kasami niraiá: chita uiagkuna, Cristowa suma iuiarispallami Taita Diospa ñawipi mana pandarig niraiankuna. Chasallatami ñugpamanda librupi willaraiá, kasa nispá:

Taita Diospa ñawipi alli
kawarig runaka,
paiwa suma iuiarispallami
kaugsanga.

Tukui runakuna, pandarig kaskakunamanda

¹⁸Runakuna Taita Diusta mana manchaspalla, tukuipi jiru ruraspalla kaugsagkuna, sutipa Alli Willaita mana uangapa munankunachu. Chi runakunawa Taita Dios, pai iapa rabiarispa kagtami suma luarmanda kawachimungapa ka. ¹⁹Chi runakuna, Taita Diosmanda ima iachariskata allillami iachankuna. Taita Diosllatami paikunata kawachimurka. ²⁰Taita Diusta mana kawaspapas, pai wiñachiskakunata kawaspami paimanda allilla iachankuna pai tiagta. Kai alpa tiaskauramandata, chi alpallawantami allilla kawachí, Taita Dios diltudupa tukui pudig tiagta. Chimandaka, paikuna mana ningapa pudinkunachu: “Nukanchi mana iacharkanchichu”. ²¹Taita Diosmanda chasa iachaspapas, mana paita nirkakunachu: “Kam, iapa suma atun Taita Diosmi kangí” u “Pai Siñur”. Chasapaka, ianga iuiaikunallawami kankuna. *Chiwanka, paikunapa iui aika mana iuiaiiugmi tukuska kankuna. Iana tutapisinami kaugsanakú. ²²“Nukanchi, iachami kanchi” nigpikunapas, paikuna upami tukuska kankuna. ²³Taita Dios mana wañugta: “Kam, iapa

suma atunmi kangí” ningataka, wañunga runakunasina rigcha ruraskatami iuiaripa munanakú. Chasallata, piskukunasina, chusku chakiuugkunasina i kulibrakunasina rigcha ruraskakunatapasma iuiarispalla kaugsanakú.

²⁴Chimandami Taita Dios paikunata sakirka, imasa jiru iuiaskasina ruraspa kaugsangapa. Chasa sakii tukuspami, pai kikinpura tukui pingaipa ruranakuspa kaugsanakú. ²⁵Taita Diosmanda sutipa Alli Willaita uangataka, llulla willaikunatami paikuna uianakú. Chasallata, Taita Dios wiñachigta kungurispa, pai ima niskata munangataka, pai wiñachiskakunatami iuiaripa munanakú. Pai Taita Diusta nukanchi nisunchi: “Kam, imaurapas iapa suma atunmi kangí. Chasa kachu”.

²⁶Chimandami Taita Dios paikunata sakirka, iapa pingaipa jiru iuiaikunata ruraspa kaugsangapakuna. Chasaka paikunapa warmikuna, kariwa kaugsanakuskata sakispa, kikin warmipura mana ruradirukunatami ruranakuspa kaugsanakú. ²⁷Chasallata karikunapas, warmiwa kaugsanakuskata sakispa, askurintimi munanakú, kikin karipura mana ruradirukunata ruranakungapa. Karipuralla pingaiachig ruradirukunatami ruranakuspa kaugsanakú. Chasa pandarigkuna, pai kikinkunapa kuirpupimi llakii nanai iukangapa kankuna.

²⁸Paikuna mana Taita Diusta rigsingapa munaskamandami pai Taita Dios sakirka, paikuna jirulla iuiangapa; chasaka, mana chaiaskakunata ruraspa kaugsangapakuna. ²⁹Paikuna, chasa tukui sug rigcha sug rigcha jiru iuiaikunawa junda kaspá, jirumi tukuipi rurankuna. Kikinmandallami sugkunapata munarinkuna. Tukuipi jiru rurangapa iuiaspallami purinakú. Sugkunata jiru iuiaspallami kawankuna. Wañuchinkunami. Piñachirinakuspallami rimanakú. Llullachinkunami. Sugkunamanda wasami rimankuna. ³⁰Sugkunamanda iangami juchachinkuna. Taita Diusta mana munankunachu. Ainirinkunami. Atun tukuspa, nirinkunami: “Nuka, sugkunamanda masmi kani”. Maskankunami, imasa sug rigcha jirupas rurangapa. Paikunapa taitata i mamata mana uiankunachu. ³¹Mana munankunachu alli iuiái apingapa. Paikuna rurangapa niskata mana rurankunachu. Mana pitapas *kuiankunachu. Mana pitapas pasinsiankunachu. Ñi mailla mana pimandapas llakinkunachu. ³²Chasa jiru ruragkunatami Taita Dios niska ka: paikunata wañungapami chaiá. Taita Dios chasa niskata iachaspapas, mana sakinkunachu, chasakunata rurangapa. Sugkunapas chasallata jiru ruranakuskata paikuna kawaspa, alli iuiachiwami tukunkunata.

Taita Dios sutipa kaskata justisiag kaskamanda

2 ¹Chimandami kam, pi kaspapas, mana sug runakunata ningapa chaiá: “Jiru ruragmi kangí”. Kasa iuiarii: kam kikinpas, chi runakuna ruranakuskasinallata ruragmi kangí. Chimanda, paikunata chasa nispa kagpi, kam kikinta Taita Diosmi justisianga. ²Iachanchimi, Taita Dios chasa

jiru ruranakuskata diltudupa ninama sitaura, imasa sutipa kaskata justisiai ruradur kagta. ³Chimanda kampas sugkunata: “Jiru ruragmi kangi” nispa, kam kikin chasallata rurag kaspapas, ¿imasatak iuiakungi, Taita Dios mana kamtapas diltudupa ninama sitangapa kagta? ⁴Taita Dios iapa suma kuiaspa, mana utkalla piñarig kagmanda, chasataka, ¿manachu munakungi? ¿Manachu iachangi, Taita Dios chasa kamta kuiaspa kaiakugta, kam jiru ruraikunata sakispa, paiwa tukugsamungapa? ⁵Chasa kaiakugpipas, kamba iui ai muruchu rumisina kspa, mana paiwa tukungapa munangi. Chimanda, Taita Dios rabiachiskata pai rabiari spa, alli justisiangapa kawachirig puncha chaiaurapa wakachirigsinami rurakungi. ⁶Chiurami Taita Dios, tukuikunata imasa ruraskasina allilla u mana allilla kaskata kawachingapa ka. ⁷Maikanpas alli ruraikunata mana sakispalla, suma puncha luarpi diltudupa kagringapa maskagkunataka: “Allimi kangi” nispa, mana puchukariduru suma kaugsaitami karangapa ka. ⁸Ikuti maikanpas kikinmandalla iuiari spa, sutipa willaskata mana uiaspa, jiru ruragkunawaka askurinti iapa rabiari spami kangapa ka. ⁹Tukui jiru ruragkunapa almakunaka, iapa llakispa irkimi kangapa kankuna. Ñugpa, judiukuna; nispaka, mana judfu kagkunapasmi chasallata llakispa kangapa kankuna. ¹⁰Ikuti tukui allilla ruragkunataka: “Allimi kangi” nispa, karangapami ka, suma puncha luarpi sumaglla kaugsagringapa. Ñugpa judiukunata; nispaka, mana judfu kagkunatapasm i chasallata karangapa ka. ¹¹Taita Diospa ñawipi, ñi pipas mana tianchu sug rigcha. ¹²Chimanda, Moisés ima rurangapa willaskata mana iachaspalla jiru ruragkunaka, Moisés willaskapi ima niraiaskamanda mana justisiai tukuspami puchukaringapa kankuna. Moisés willaskata iachaspapas, jiru ruragkunaka, Moisés willaskapi ima niraiaskamanda justisiai tukuspami chasallata diltudupa ninama sitai tukungapa kankuna. ¹³Moisés ima willaskata uiaspapas mana ruragta, Taita Dios mana ningapa kanchu: “Kam, mana pandarigmi kangi”. Moisés willaskata uiaspa allilla ruragkunami allillapi kankuna. ¹⁴Mana judfu kagkunaka, Moisés willaskata mana iachaspapas, Moisés imasa willaskasina paikunapa suma iui ai llawa allilla ruraspa kagpikunaka, paikunapa alli iui ai mi Moisés willaskasina allilla tukugsamú. ¹⁵Paikuna, allilla ruraskawami kawachinkuna, Moisés imasa willaskasina paikunapa iui ai pi charinakugta. Pai kikinkunapa alli iui ai llatatami chita kawachí. *Chiwanka, paikunapa iui ai rillawa kawari spami willaringapa kankuna, allilla u mana allilla ruraspa kaugsagtakuna. ¹⁶Tukui runakuna imapas pakalla iui askata i ruraskata, Taita Diosmi Jesucristowa kawachingapa ka; chiurami willaringapa kankuna. Chasallatami nuka willaska Alli Willai pi niraiá.

Judiukuna, Moisés ima willaskata mana ruraskamanda

¹⁷Maikan kampura nichu: “Judiumi kani; Moisés ima rurangapa willaskatami iui irini”. “Taita Diospallami kani” iuiari spa, atunmi tukungi. ¹⁸Taita Dios ima munaskata allillami iachangi. Moisés willaskata iachaikuspa, iachangimi allilla ruraita agllangapa. ¹⁹Kasapasmi iui irikungi: “Nawiwa mana kawagsinakunata,

nukami allilla pusag kani. Iana tutasinapi kaugsagkunapa iuiaikunata punchaiachigsinami kami. ²⁰Moisés willaskata iukaspá, Taita Diosmanda sutipa kaskatapasmi iachani. Chasaka, mana iuiaiugkunata iuiachigmi kani. Wambrasinakunata iachachigpasmi kani”. ²¹Kam chasa: “Sugkunata iachachigmi kani” iuiarispaka, ¿imapatak kam kikin mana allilla iuiaringi? “*Mana sisakungi” nikuspaka, kam kikin, ¿imapatak sisangi? ²²“*Mana sugpa warmiwa siriringi” nikuspaka, ¿imapatak kam kikin, sugpa warmiwa siriringi? Ianga diuskunata mana munaspaka, ¿imapatak kam kikin, chi diuskunata iuiaridiru wasikunapi ima tiaskata sisagsina rurakungi? ²³Moisés willaskata iukaskawa atun tukuspaka, ¿imapatak chipi ima niraiaskata wabutispa, Taita Diusta kamigsina jiru rurakungi? ²⁴Chasallatami ñugpamanda librupi willaraiá, kasa nispá:

Kam judiukunamandami

mana judíu kagkuna Taita Diusta kamispa kankuna.

²⁵Moisés tukui ima niskata kam ruragpika, judiukunapa marka kamba kuirpupi churaraiaskaka allillami ka. Ikuti Moisés niskata kam mana ruragpika, chi marka mana churaskasinami niraiangapa ka.

²⁶Chimanda maikanpas chi marka mana churaska kagka, Moisés imasa niskasina allilla rurakupika, ¿manachu chi marka churaraiaskasina niraiagsamú?

²⁷Maikan chi marka kuirpupi mana churaska kaspapas, Moisés imasa niskasina allilla ruragka, paimi kawachingapa ka, kam jiru rurag kagta. Kam, chi marka churaraiaaska kaspá, Moisés niskata iachaspapas, mana allilla ruragmi kangi.

²⁸Sugkunapa kawailapi alli iuiag kagta kawarigka, mana alli judíu niraianchu. Chasallata, judiukunapa marka kuirpupi churaraiaag, chillawa mana niraianchu, sutipa judíu kagta. ²⁹Paipa suma alli iuiái iuiaskawami alli judíu niraiá. Chasallata, tukui jiru iuiaikunata anchuchirig, chimi judiukunapa marka iukagsina niraiá. Chi marka mana niraianchu Moisés imasa willaskasina ruraskawa. Santu Ispirituwami chasa marka churagsina niraiá. Chasa niraiagkunata, kai alpamanda runakunaka mana ningapa kanchu: “Allimi kangi”. Taita Diosmi: “Allimi kangi” ningapa ka.

3 ¹Chasa niraiagpika, judíu kagpika, ¿imapitak alli ningapa niraiá? Chasallata judiukunapa marka churaska kagpika, ¿imapitak mas allilla kapunga? ²Achkapimi mas allilla kapunga. Kaiwami kallariirka: Taita Dios, pai iuiachikuskasina rimaitami judiukunata mingagsamurka. ³Sug judiukuna paipa rimaita mana uangapa munagpikunaka, chika, ¿imatak niraiá? ¿Niraianchu, Taita Dios kikin, pai ima rurangapa niskata sakingapa kagta? ⁴Chikar, ñi imapas manima. Tukui runakuna llulla kagpipas, Taita Dioska, imaurapas pai rurangapa niskata sutipami rurangapa ka. Chasallatami ñugpamanda librupi willaraiá, kasa Taita Diusta nispá:

Kam ima niskakunata rurag kagmanda, niikimi:

“Kam, allimi kangi”.

Chasallata, kam tukui ima ruraskata kawariskaka, tukuipi allillami kapungapa kangi.

⁵Kunauraka, runakunapa iuiaiwami rimani. Sugka nichu: “Nukanchi mana allilla ruraskakunamandami Taita Dios alli justisiag kagta kawachirí; chika, ¿imatak niraiá? ¿Niraianchu, Taita Dios, nukanchiwa rabiarispa, pandarikugta?”. ⁶Ñi imapipas manima. Taita Dios kikin pandarii iukagpika, ¿imasatak pudintra, kai alpapi, kaugsagkunata allilla justisiangapa?

⁷Kasapas iuiarispa nichu: “Nukapa llullai balintra, Taita Dios mana llulla kagta mas suma iacharingapa. Chasakuna baligpika, ¿imawantak niwangapa ka, nuka pandariska kagta? ⁸Chasapaka, nukanchi jiru ruraspalla kaugsanakusunchi. Chasapika, paimanda tukui allillami tukugsamungapa ka”. Chasallatami sugkuna, nukanchi iachachinakuskata juchachispa kankuna. Paikunatami chaiaku, diltudupa ninama sitangapa.

Tukuikuna, pandarig kaskamanda

⁹Chasa kagpika, nukanchi judiukuna, ¿sugkunamanda mas allichu kanchi? Ñi imapas manima. Ñami nirkaikichita, judfu i mana judfu kagkuna, tukuikunami pandariiwa wataskasina kankuna. ¹⁰Chasallatami ñugpamanda librupi willaraiá, kasa nispa:

Mana pandarig,
ñi sug mana tianchu.

¹¹Taita Dios ima niskata,
ñi pipas mana iuiarig tianchu.
Taita Diusta maskagpas,
ñi sug mana tianchu.

¹²Tukuikunami, Taita Dios ima niskata sakispa,
sug rigcha ianga iuiaita katirkakuna.
Allilla ruragka, mana tianchu ñi sugllapas.

¹³Paikunapa simi kanmi wañuskata pambadiru paskaraiaskasina.
Chi ukuma wañuska ismuska asnarikugsinami ka.
Paikunapa kalluwami llullankuna.
Paikunapa simiwa jiru rimaska, kulibra kanigsinami rurankuna.

¹⁴Paikuna ima rimaskapipas,
jiru millaillawami kaminkuna.

¹⁵Paikunapa chakiwa kalpankunami, wañuchispa, iawar kawangapaglla.

¹⁶Paikuna maipi puriskapipas,
tukuita llakichispa,
puchukaspami purinkuna.

¹⁷Mana iachankunachu, imasa sumaglla kaugsangapa.

¹⁸Mana imaurapas iuiarinkunachu, Taita Diusta manchangapa.

¹⁹Kasami iachanchi: Moisés tukui ima niskapi, chi niskawa wataskasina kagkunata ima rurangapa willaraiá; chasaka tukui kai alpapi kaugsagkuna, Taita Diospa ñawipi upalla kaspera, paikuna jiru ruranakuskata kawachii tukungapa. ²⁰Moisés niskata uiaspa ruraskakunallawaka, mana pandarig,

ñi pipas mana niraiangapa kanchichu. Moisés niskawami iachagsamunchi, nukanchi pandarig kagtakuna.

Cristowa suma iuiarispá, mana pandarig niraiaskamanda

²¹Kunauraka, Moisés ima rurangapa willaskata sakispa, Taita Dios iachachinmi, imasa nukanchi mana pandarig niraiangapa. Moisés i Santu Ispirituwa rimagkunapas, chasallatami ñugpata willaska karka. ²²Jesucristowa suma iuiarispami Taita Diospa ñawipi mana pandarig niraianchi. Maimanda runakunapas, tukui paiwa iuiarigkunami mana pandarig niraianchi. ²³Tukuikunami pandarinchi. Chimandaka, Taita Dios atun sumaiachiskamanda iapa karupisinami karkanchi. ²⁴Pai Taita Dioska, tukuikunata suma kuiaspa, Jesucristowami kispichí, nukanchi paita ñi ima mana karagpipas; chasaka nukanchi, mana pandarigkuna niraiangapa. ²⁵Chasapika, Taita Dios nirka, Jesucristo wañuchii tukuspa, paipa iawar ichariskawa nukanchipa pandariikunata anchuchingapa. Paiwa suma iuiarigmandami pasinsiai tukurkanchi. Ñugpamanda maituku pandarii ruragpikunapas, Taita Dios, nukanchimanda iapami llakii iukarka. Chasawami tukui chi pandariikunata kungarirka. Chasaka, Jesucristo wañuskawami kawachirka, pai imapipas imasa chaiaskasina allilla rurakugta. ²⁶Kunaura kausagkunatapasma kawachí, pai imapipas imasa chaiaskasina allilla rurakugta. Paillatataki nukanchita ni: “Jesuswa suma iuiarispami mana pandarig niraiangichi”.

²⁷Chasa kagpika, ¿pudinchichu, Taita Diospa ñawipi atun tukungapa? Mana pudinchichu. ¿Imamanda? ¿Moisés ima niskata ruraskamanda? Manima. Jesuswa suma iuiarispami mana pudinchi, Taita Diospa ñawipi atun tukungapa. ²⁸Chasamandami ninchi: maikanpas Jesucristowa suma iuiarispami mana pandarig niraianchi, Moisés ima niskata mana ruragpipas.

²⁹Taita Dioska, ¿judiukunapallachu ka? ¿Manachu ka mana judíu kagkunapa Diospas? Ari, mana judíu kagkunapa Diospasmi ka. ³⁰Taita Dios, sugllami tia. Paimi ka judiukunapa marka i mana marka churaskakunatapás nig: “Jesuswa suma iuiarispami mana pandarig niraiangichi”. ³¹Chasa suma iuiarigpikunaka, Moisés ima rurangapa willaska, ¿iangachu tukugsamú? Ñi imapas manima. Chasapaka, ninchimi: “Masmi Moisés willaska, allilla ka”.

Ñugpamanda taita Abraham, Taita Dioswa suma iuiariskamanda

4 ¹Chasa kagpika, ¿imasatak niipa, nukanchipa ñugpamanda achala taita Abraham mana pandarig niraiagta? ²Abraham paipa allilla ruraikunallawa mana pandarig niraiagpika, pai pudirkami, “Runapuramanda tukuipa mas allimi kani” iuiaringa; ikuti Taita Diospa ñawipika, chasaka manima. ³Ñugpamanda librupi, kasami Abrahammanda willaraiá:

Abrahamka, Taita Dios ima niskata iuiarispami karka:
“Chasami tukunga”.

Chimandami pai mana pandarig niraiá. ⁴Maikanpas ima ruraskamanda kulki chaskigpika, mana niraianchu *kuiaspalla karaska. Paita chaiaskata chaskiskami niraiá. ⁵Ikuti maikanpas, ñi ima mana ruraspapas, Taita Dios pandarigkunata chaskigwa suma iuiarichu: chasa iuiarigmandami pai mana pandarigsina niraiá. ⁶Ñugpamanda achala taita Davidmi pandariska runamanda nirka: “Taita Dios paita: ‘Mana pandarigmi niraiapuangi’ nigpika, iapa alli iuiachiiwami kanga”. Kasami nirka:

⁷Jiru ruraskakunata pasinsiai tukuspa, pandariikunata anchuchiskakunaka, iapa alli iuiachiiwami tukunkunata.

⁸Maikan runa pandariskamanda,
atun Taita Dios mana imapas nispa sakigpika,
iapa alli iuiachiiwami kangapa ka.

⁹¿Judiukunapa marka churaskakunallatachu chasamanda alli iuiachiiwa tukungakunata? ¿Chi marka manara churaskakunatapaschu chasallata alli iuiachiiwa tukungakunata? Ñami ninchi: “Abraham Taita Dioswa suma iuiariillawa kagmandami pai mana pandarig niraiá”. ¹⁰¿Imauratak paita nirka, mana pandarig niraiagta? ¿Judiukunapa marka ña churaska u manara churaska kaurachu chasa nirka? Churaska kaura, manima; manara churaska kagpitami chasa nirka. ¹¹Chasa niskauramandami Abraham judiukunapa marka churachirirka. Chi markawa kawachirirkami, Taita Dioswa suma iuiariillawa kagmanda, pai mana pandarig niraiaska kagta. Chimandami Abraham, Taita Dioswa suma iuiarigmanda, tukui paikunapa ñugpamanda achala taita niraiá, judiukunapa marka mana churaska kagpipas; chasaka paikunapas, mana pandarig niraiangapa. ¹²Judiukunapa marka churaska kagkunapa ñugpamanda achala taitapasmi niraiá. Imasami Abraham, manara judiukunapa marka churachirispá, Taita Dioswa suma iuiarispá kausakurka: chasallatami paikunatapas kausangapa chaiá.

Taita Dios karangapa niskata, Abraham suiakuskamanda

¹³Taita Dios, Abrahamta nirka: “Kamba wambrapa wambrakunapa kati wambrakunatami kai alpata karangapa kani”. Mana chasa nirkachu, Moisés ima niskata Abraham ruraskamanda. Taita Dioswa suma iuiariillawa kagmandami chasa nirka. Chasa iuiariskamandami paita nirka, mana pandarig niraiagta. ¹⁴Moisés niskallata ruraspá, Taita Dios niskata chaskingapa kagpika, iangami Taita Dioswa suma iuiarintranchi. Taita Dios niskapas, iangami tukuntra. ¹⁵Moisés niskata iachaspapas mana ruragkunawa, Taita Dios iapami rabiari. Ikuti Moisés niskata mana iachagkunaka, chi niskamanda mana pandariska niraianchu.

¹⁶Chimanda, Abraham Taita Dioswa suma iuiariskamandami pai Taita Dios nirka, chasa karangapa, Chasaka, Abrahampa wambrapa wambrakunapa tukui kati wambrakunata, Taita Dios, suma kuiaspa, sutipami ima niskataka karangapa kankunata. Chika mana niraianchu, Moisés niskata ruragkunamandalla. Maikanpas Abrahamsina Taita Dioswa suma

iuiarigkunamandapasmi niraiá.; Paimi tukui nukanchipa ñugpamanda achala taita ka. ¹⁷Chasallatami ñugpamanda librupi willaraiá, Abrahamta kasa nispá: “Achka alpakunapi kaugsagkunapa iaia taita tukungapami agllarkaiki”. Taita Dios chasa niskatami Abraham suma iuiarirka. Taita Diosllatami ka wañuskakunata kaugsachig i ñ ima mana tiaskakunatapás wiñachig.

¹⁸Chasa Taita Dios, Abrahamta niska karka: “Kamta agllarkaikimi, achka alpakunapi kaugsagkunapa iaia taita tukungapa” i “Kamba wambrapa wambrapa kati wambrakuna, iapa achkakunami tukugsamungapa kankuna”. Chasa, Taita Dios niska mana tukungasina kagpipas, Abrahamka suma iuiaspallami suiakurka. ¹⁹Pai ñalla *patsa wata iukaspá, ñi sug wambra mana iukaska karkakuna. Chasallata paipa warmi, chusami karka. Chasa kagpipas, Taita Dios ima niskata iuiaspallami Abraham suiakurka. ²⁰“Taita Dios ima niskata mana chasa tukugsamungachu” iuiaringataka, paiwa mas sumami iuiarispá suiakurka. “Kam, iapa suma atunmi kangí” nispami iuiarikurka. ²¹Pai, iuiariillapimi iuiakurka: “Imasami Taita Dios rimarka: chita tukuimi chasa tukugsamungapa ka”. ²²Chasa iuiariillawa kagmandami Taita Dios paita nirka: “Mana pandarigmi niraiangi”.

²³Chasa willaraiaskaka mana niraiianchu Abrahammandalla. ²⁴Nukanchimandapasmi chasa willaraiá. Taita Dios nukanchipa Iaia Jesucristo wañuskata kaugsachigwa suma iuiarigkunatapasmí ningapa ka: “Mana pandarigkunami niraiangichi”. ²⁵Nukanchipa pandariikunamandami Jesucristo wañuchii tukurka. Nukanchi mana pandarig niraiangapami pai, wañuspa, kaugsarirka.

Mana pandarig niraiaspaka, ima chaskiskamanda

5 ¹Nukanchi Iaia Jesucristowa suma iuiariskapi mana pandarig niraiaspaka, paimandami Taita Dioswa pasinsiachinakuska niraiianchi. ²Paiwa suma iuiariskapimi pai kikinwa Taita Diospa suma kuiaita chaskigsamurkanchi. Taita Dios nukanchita kuiaskawami allilla iuiarispá kanchi. Nukanchi paiwa suma puncha luarpi kagringapami suianakunchi. Chasa suianakuspaka, alli iuiachiiwami kanchi.

³Kasapas. Ima llakiikuna chaiagpipas, alli iuiachiiwami kanchi. Kasami iachanchi: chi llakiikunawaka iachachigta imapipas mana sambaiaspalla kaugsangapa. ⁴Mana sambaiaspalla kaugsanakuskataka, Taita Dios ningami: “Allillami kaugsakungi”. Taita Dios chasa nukanchita nigpika, iapa suma iuiaiwami suianakusunchi. ⁵Chasa iuiaiwaka mana ianga suianakusunchichu. Santu Ispiritutami Taita Dios nukanchita karamurka. Santu Ispirituwami iachanchi, Taita Dios nukanchita iapa kuiag kagta.

⁶Nukanchi imasapipas mana kispirii pudinakugmandami, Taita Dios kikin agllaska puncha chaiaura, Cristo pandarigkunamanda wañugsamurka. ⁷Maikan alli runamanda, maikanpas manachar wañuntra. Maikan iapa alli runamanda tiantrami maikan paimanda wañungapa. ⁸Ikuti nukanchi ñi

imapi mana alli runakuna kagmandami Cristo wañugsamurka. Chasapimi Taita Dios kawachigsamurka, imasa nukanchita sutipa iapa kuiagta.

⁹Chasa Cristo wañuskamandami kunaure mana pandarig niraiianchi. Chasa kagmandami Cristollatata, tukurii puncha Taita Dios rabiakuskata nukanchita kispichigsamungapa ka. ¹⁰Nukanchi manara Taita Diusta munag kaurami nukanchiwa i pai kikinwa pasinsiachigsamurka, paipa wambra wañuskamanda. Chasa pasinsiachinakui tukuskamanda, Cristopa kaugsaiwami tukurii puncha nukanchita kispichingapa ka.

¹¹Kasapas. Iaia Jesucristowa nukanchi ña pasinsiachinakui tukuspa, paillawantami Taita Dioswa alli iuiachiiwa kanchi.

Adanmanda i Cristomandu

¹²Suglla runamandami kai alpapi pandariikuna tukugsamurka. Pai pandariskamandaka, wañuipasmi chaiagsamurka. Chasallatami tukuikuna pandarirkakuna. Chimandami tukui runakunata wañui chaiarka. ¹³Moisés ima rurangapa willaska manara tiagpitami ña kai alpapi pandariikuna tiarka. Chasa pandarigpikunapas, manara Moisés willaska tiagmanda, Taita Dios chi pandariskakunata mana justisiangapa iuiarkachu. ¹⁴Mana iuiachigpipas, Adán pandariskauramandata Moisés kaugsankama, tukui pandarigkunami wañurkakuna. Adán, Taita Dios ima niskata mana uiarkachu. Sugkunaka, sug rigcha pandariikuna ruraspami wañurkakuna.

Adanta kawaspaka, niraiarkami katima sug runa samungapa kagta. ¹⁵Chasa niraiagpipas, Adán pandariskawa i Taita Dios nukanchita karamuskawaka manima alli kanchu imasa ninga. ¹⁶Ari, suglla runa pandariskawa i Taita Dios karamuskawa manima alli kanchu imasa ninga. Chasa, Adán suglla pandarii ruraskamandami Taita Dios, justisiai ruraspas, wañuita kachamurka. Ikuti Taita Dios nukanchita kispichigta kachamurka; paiwaka, nukanchi achka pandariikuna ruraspapas, mana pandarig niraiangapa. ¹⁷Suglla runa pandariskamandami wañui chaimurka, tukui runakunata mandagsina kangapa. Ikuti Taita Dioska, nukanchita iapa kuiaspami pasinsia, mana pandarig niraiangapa. Tukui chasa niraiagkunaka, suglla Jesucristomanda paiwa mandangapami kaugsagringapa kanchi.

¹⁸Chasamanda, imasami, suglla runa pandarii ruraskamanda, tukui runakunata wañui chaiarka: chasallata, suglla mana pandarig runa wañuskamanda, tukui paiwa iuiarigkuna, mana pandarig niraiaspa, kaugsagringapakuna. ¹⁹Imasami, suglla runa Taita Dios niskata mana ruraskamanda, tukui runakuna pandarig niraiagsamurkakuna: chasallata, suglla runa Taita Dios niskata allilla ruraskamandami achka runakuna mana pandarig niraiangapa kankuna.

²⁰Moisés ima rurangapa willaskaka tukugsamurkami, maikan pandariikuna kagta iacharingapa. Pandariikuna maituku achka tiagpipas, Taita Dioska paipa

suma kuiaitami mas allipa kawachirka. ²¹Imasami runakuna, pandariikunawa mandai tukunkuna wañunkama: chasallatami Taita Diospa suma kuiaiwamandai tukunkuna; chasawaka, mana pandarig niraiaspa, nukanchipa Iaia Jesucristowa mana puchukaridiru suma kaugsaita iukangapa.

Pandaringapa wañuskasina kaspaka, Cristowa kaugsariskamanda

6 ¹Chasa kagpika, ¿kasachu nisunchi: “Pandariilla apasunchi; chasaka, Taita Diospa suma kuiaita mas nukanchita kawachingapa”? ²Ñi imapas manima. Mana mas pandaringapa wañuskasinami kanchi. Chasa kaspaka, mana iukanchichu, ikuti pandarisa kaugsanakunga. ³Tukui bautisai tukuskakuna, Jesucristowa tukuspa, paiwa wañuskasinami niraianchi. Chita, ¿manachu iachangichi? ⁴Chimanda, nukanchi bautisai tukuspa, paiwa pambai tukuskasinami niraianchi, sugllapi wañuskasina niraiangapa. Chasaka, imasami Taita Diospa iapa suma iachaiwa Cristo wañuskata kaugsachirka: chasallata nukanchipas, musu kaugsaita iukaspas, kaugsasunchi.

⁵Nukanchi Cristowa sugllapi wañuskasina niraiaspaka, paisinallatatami kaugsarisunchi, paiwa sugllapi kagringapa. ⁶Kasami iachanchi: nukanchi ñugpa kaugsaska, Cristowa kruspi klabaskasinami niraiarkanchi; *chiwanka, nukanchipa pandaringapa iuiakuna puchukarisa, pandariwa mana wataraiaskasina kaugsangapa. ⁷Maikan pandariikunamanda wañuskasina kagpika, wataraiaskamanda kachariskasinami tukú. ⁸Nukanchi Cristowa sugllapi wañuskasina niraiaspaka, kasami iuiarinchichu: kaugsarisa, paiwa sugllapi kagringapa. ⁹Kasapasmi iachanchi: Cristo, wañuska kaugsarispaka, mana imaurapas ikuti wañungapa kagta. Wañui, mana ikuti paita chaiai pudingapa kanchu. ¹⁰Tukuikunapa pandariikunamandami Cristo sugbiajilla wañurka. Kaugsariskauramandaka, Taita Diosmandallami kaugsaku. ¹¹Chasamanda kamkunapas, mana mas pandaringapa wañuskasina tukungichi. Jesucristowa iuiarisa, Taita Diosmandalla kaugsangichi.

¹²Chimanda, kamkunapa ismunga kuirpupi pandariikuna mandagsina *mana tiachu. Chasa tiagpika, imasa jiru iuiaskasina ruragkunami tukuntrangichi. ¹³Chasallata, kamkunapa kuirpupi ima iukaskawa *mana sakiriichi; chikunawaka, jiru rurangapa. Chasapaka, wañuspa, kaugsariskasina niraiaspa, Taita Diospa lutrinsina tukuichi. Kamkunapa kuirpupi ima iukaskakunatapas paita iukachiriichi; chikunawaka, tukuipi allilla rurangapa. ¹⁴Chasaka pandariikuna, kamkunapa kuirpupi mana mandagsina tiangachu. Moisés ima rurangapa willaskawa mana wataskasina kangichichu. Taita Diospa suma kuiaipimi wataraiaskasina kangichi.

Taita Dios ima niskata rurangapa, paipa lutrinsina tukusunchi

¹⁵Chasa kaspaka, ¿kasachu nisunchi: “Moisés niskawa ña mana wataskasinami kanchi. Taita Diospa suma kuiaipi wataraiaskasinami kanchi.

¿Chimandachu pandarisunchi?”? Ñi imapas manima. ¹⁶ ¿Manachu kasa iachangichi? Maikan, patrumpa lutrin tukuspa, iukanmi pai ima niskata ruranga. Pandariikunawa wataskasina tukugpika, paita wañuimi chaianga. Ikuti Taita Dios ima niskata rurangapa paipa lutrinsina tukugpika, allilla ruraspami kaugsanga. ¹⁷ Kasamandami Taita Diusta: “Pai Siñur” nipuikichita: kamkuna, pandariikunawa wataskasina kaspapas, kunaureka Cristomanda iachachiskata uiaspa, tukui iuiaiwami pai ima niskata ruraspakaugsanangkungichi. ¹⁸ Pandariikunawa wataraiaskamanda kachariskasina tukuspaka, Taita Diospa lutrinsinami tukurkangichi, allilla ruraspakaugsangapakuna. ¹⁹ (Kamkuna, nuka iachachiskata manara allilla iui ai apingichichu. Chimandami runakuna uiangasina rimaspakaugsanangkungichi.) Nupata, kamkunapa kuirpupi ima iukaskawami sakirirkangichi, wataskasina, jiru mana chaia ruraspakaugsangapa. Kunaureka chasallata, kamkunapa kuirpupi ima iukaskata Taita Diusta iukachiriichi; chikunawaka, allilla ruraspakaugsangapakuna. ²⁰ Kamkuna pandariikunawa wataskasina kaugsanakuspaka, Taita Diospa lutrinsina mana karkangichichu, imapipas allilla ruraspakaugsangapa. ²¹ Chi jiru ruraskamanda, ¿imatak chaskirkangichi? Chasa ruraskakunamandaka, kunaureka kamkunata iapa pingaipami iuiachiku. Chasa ruragkunaka, wañuillami chaskinkuna. ²² Ikuti kunaureka, pandariikunawa wataraiaskamanda kachariskasina tukuspa, Taita Diospa lutrinsinami tukurkangichi. Chasa, paipalla kaspaka, mana puchukaridiru suma kaugsaitami chaskigringapa kangichi. ²³ Pandarispakaugsangapakuna, wañuitami chaski. Ikuti Taita Dioska, nukanchipa laia Jesucristowa mana puchukaridiru suma kaugsaitami kará.

Moisés ima rurangapa willaskamanda kachariskasina tukuskamanda

7 ¹ Kam taitakuna i mamakuna, Moisés ima rurangapa willaskata allillami iachangichi. ¿Manachu kasapas iachangichi? Maikanpas chi willaskawa mandai tukugka, kaugsankamallami chita rurá. ² Kusaiug warmika, kusa kaugsankamami imasa Moisés niskasina iuká, kusawa wataskasina kanga. Ikuti kusa wañugpika, Moisés niskata wataraiaskasina kaskamanda kachariskasinami tukú. ³ Kusa *chara kaugsakugpita, chi warmi sug kariwa sugllapi kaugsagripika, iapa atun pandariimi rurá. Ikuti kusa wañugpika, Moisés niskata wataraiaskasina kaskamanda kachariskasinami tukú. Nispaka, sug kariwa kasaragpika, ñi ima pandarii mana niraianchu.

⁴ Chasallata, nukapa *kuiaska taitakuna i mamakuna, Cristo wañuskamanda, kamkunapas, wañuskasina niraiaspakaugsangapakuna, Moisés ima rurangapa willaskamanda kachariskasinami kangichi; chasaka, sug kusa niraiagsina Cristowa tukungapakuna. Cristo wañuspa kaugsarigwami kunaureka tukunchi; chasaka, Taita Diosmanda tukuipi allilla ruraspakaugsangapakuna. ⁵ Nukanchipa kuirpupi iuiailawa ruraspakaugsanakupakaugsangapakuna, Moisés ima rurangapa willaskawami iuiachii tukurkanchi, nukanchi imasa munaskasina pandarispakaugsangapakuna. Chasa kaugsaspakaugsangapakuna, Taita Diospa ñawipi wañuskami niraiarkanchi. ⁶ Ikuti kunaureka,

Cristowa wañuska niraiagsamuspa, Moisés ima rurangapa willaskamanda kachariskasinami tukurkanchi; chasaka, Taita Diospa lutrinsina allilla ruraspa kaugsangapa. Ñugpa willaraiaska niskamanda, manima; Santu Ispirituwa musu kaugsaita iukaspami paipa lutrinsina allilla ruraspa kaugsanakunchi.

Pandaringapa iuiái, nukanchipa kuirpupi tiaskamanda

⁷Chasa kagpika, ¿nisunchichu, Moisés ima rurangapa willaska, pandarii niraiagta? Ñi imapas manima. Mana chasa kagpipas, Moisés willaska mana tiagpika, manami iachangapa karkani ima ruraikuna pandarii niraiagta. Moisés niskapi willaraiá: “Sugkuna iukaskakunata *mana munaringi”; mana chasa willaraiagpika, manami iachangapa karkani sugkunapata munarii, pandarii niraiagta. ⁸Chasa kagpipas, Moisés niska tiaskamandaka, pandarii kaskata iachagsamuskawami iuiachiriwarka, tukui ima sugkuna iukaskata munaringapa. Moisés niska mana tiagpika, chi pandariikuna wañuskasinami niraiiantra. ⁹Nuka ñugpata Moisés ima rurangapa niskata mana iachaspallami kaugsakurkani. Moisés niskata nuka iachagsamuuraka, pandariikuna nukapa iuiáiipi kaugsarigsinami tukugsamurkakuna. ¹⁰Chiura nukaka, Taita Diospa ñawipi wañuskami tukurkani. Chasaka, Moisés niskata chaskispa, kaugsaita iukangataka, wañuska kagsinami tukurkani. ¹¹Chasaka, Moisés niska tiaskamanda, chita iachaspa, pandariikunawami pandachii tukurkani. Chi niskapi pandarispami wañuskasina tukurkani.

¹²Moisés tukui ima rurangapa willaskaka, ñi ima mana pandariipi niraiianchu. Tukuipi allillami ka. Tukuipi allipami niraiá. ¹³Chasa kagpika, ¿chi alli willaskawachu wañuskasina tukurkani? Ñi imapas manima. Pandariskawami wañuskasina tukurkani. Chi alli willaskawami pandarii ima kaskata iachagsamurkani. Chasa iachaspami, pandarispá, wañuskasina tukurkani. Chasaka, Moisés willaskawami kawachí, pandariikuna ruraika, iapa mana allilla kagta.

¹⁴Iachanchimi, Moisés ima rurangapa willaska, Santu Ispíritu iuiachiska kagta. Ikuti nukaka, kai kuirpupi kaugsankama, katuskasina kaspá, pandariikunawa wataraiaskasinami kani. ¹⁵Nuka mana iachanichu ima rurakugta. Nuka ima allilla rurangapa munakuskata mana ruragmi kani. Ikuti ima mana rurangapa munaskataka, chitami rurani. ¹⁶Nuka ima mana munakuskata ruraskawami iuiarini, Moisés niska alli kagta. ¹⁷Chasa kagpipas, nuka kikin mana munanichu, chi jiru ruraikunata rurangapa. Pandaringapa iuiái nukapa kuirpupi tiaskawami chikunata munachiwá rurangapa. ¹⁸Iachanimi, nukapa kuirpupi mana ñi imapas alli iuiái tiagta. Ima allilla rurangapa iuiái samuwagpipas, mana pudinichu chita rurangapa. ¹⁹Allilla rurangapa munakuskata mana rurani. Ikuti jiru rurangapa mana munakuskataka, chitami rurani. ²⁰Chasa nuka mana rurangapa munakuskata ruragpika, nuka kikin mana munanichu, chi jiru ruraikunata rurangapa. Pandaringapa iuiái nukapa kuirpupi tiaskawami chikunata munachiwá rurangapa.

²¹Chimandami iachani, nuka allilla rurangapa munakuura, pandaringapa iuiui, nukapa kuirpupi tiagta. ²²Nukapa iuiaipika, Taita Dios ima niskatami allilla rurangapa iuiani. ²³Chasa kagpipas, nukapa kuirpupika sug rigcha jiru mandai tiagtami kawani. Chi jiru mandai nukapa kuirpupi tiaspaka, suma iuiai kaska mandaskawa makanakugsinami tukugsamú. Chi jiru mandaika, wataskasinami chariwaku. Chasaka, pandariikuna rurangapagllami munachiwá.

²⁴iAi nukajim, imachar pasasa! ¿Pitak pudí, kai kuirpu diltudupa wañuima chaiachiwakugriskata kispichiawangapa? ²⁵Taita Diosllami pudí, nukanchipa Iaia Jesucristowa kispichiawangapa. Chimandami Taita Diusta: “Pai Siñur” nini. Chasaka, nukapa iuiaiwa Taita Dios niskatami rurag kani. Ikuti nukapa kuirpuwaka imapipas pandarispami kani.

Santu Ispíritu iuiachiskasina kaugsasunchi

8 ¹Kunaura, Jesucristowa tukuskakunaka, manima diltudupa ninama sitai tukungapa kankunachu. ²Santu Ispíritu iuiachiska mandaiwaka kaugsaitami kará; chi mandaiwami jiru pandariikunata Jesucristomanda kispichiska kanchi; chasaka, mana diltudupa wañuima chaiagringapa. ³Nukanchi pandarigkuna kaskamanda, Moisés ima willaskawa mana rurangapa pudiriskata, Taita Diosmi rurarka. Pai kikinpa wambrata kachamuspami chasa rurarka. Cristoka, pandarigkunapa kuirpuwasina aichaiug tukuspa, nukanchipa pandariikunamandami wañugsamurka. Chasaka, Cristopa kuirpuwami nukanchipa pandariikunata puchukaspa chingachirka; ⁴chasaka, Moisés ima niskata nukanchi rurai pudingapa. Nukanchipa kuirpupi iuiailawa ruraspa mana kaugsanakunchichu. Santu Ispíritu ima iuiachiskallawami chasa kaugsanakunchi.

⁵Maikanpas kikinpa kuirpupi iuiailawa kaugsag, kai alpapi ima tiaskakunallawami iuiaspalla kanga. Ikuti Santu Ispíritu iuiachiskallawa kaugsagka, chasallata Santu Ispiritumanda allilla iuiaspallami kanga. ⁶Kai alpapi ima tiaskakunallawa iuiagkuna, diltudupa wañuimami chaiagringakuna. Ikuti Santu Ispirituwa allilla iuiagkunaka, sumaglla kaugsaitami tarinkuna. ⁷Kai alpapi ima tiaskakunallawa iuiagkuna, Taita Diustami mana munankuna. Pai ima nikuskata mana uiaigkunami kankuna. Mana pudinkunachu, pai ima nikuskata uiangapa. ⁸Maikanpas kikinpa kuirpupi iuiailawa kaugsagkuna, Taita Diusta mana pudinkunachu kuntintachingapa.

⁹Taita Diospa Ispíritu kamkunapa iuiai sutipa kaugsakugpika, kam kikinkunapa kuirpupi iuiailawa mana kaugsangapa kangichichu. Santu Ispíritu ima iuiachiskallawami kaugsangapa kangichi. Maikanpas Cristopa Ispirituta mana iukaspaka, Cristopa mana kanchu. ¹⁰Cristo kamkunapa iuiai kaugsakugpika, kamkunapa kuirpu pandariskamanda wañungapa kagpipas, kamkunapa ispirituka kaugsami ka, kamkuna mana pandarig niraiaskamanda. ¹¹Taita Dios, Jesucristo wañuskata kaugsachigpa Ispíritu kamkunapa iuiai kaugsakugpika, kikin Taita Dioska kamkunapa wañuska kuirputapasmi diltudupa kaugsachingapa ka. Paipa Ispíritu kamkunawa kaugsakuspami chasa kaugsachingapa ka.

¹²Chasamanda, taitakuna i mamakuna, mana iukanchichu, nukanchipa kuirpupi iuiakuskallawa kaugsanga. Santu Ispíritu ima iuiachiskallawami kaugsai iukanchi. ¹³Kam kikinkunapa kuirpupi iuiakuskallawa kaugsanakugpika, diltudupami wañungapa kangichi. Ikuti Santu Ispirituwa kamkunapa jiru rurangapa iuianakuskata sakigpikunaka, diltudupa kaugsaitami tarinkangichi.

¹⁴Taita Diospa Ispíritu ima iuiachikuskata tukui katiraiagkuna, chikunami Taita Diospa wambrakuna niraianchi. ¹⁵Kamkuna, wataraiangasina ispirituta mana chaskirkangichichu, ikuti manchaiwa kaugsangapa. Taita Diospa Ispirittutami chaskirkangichi; chasaka, paipa wambrakuna tukungapa. Santu Ispirituwami, Taita Diusta kaiaspa, ninchi: “Taitiku”. ¹⁶Kikin Santu Ispiritumi nukanchipa ispirituta iuiachispa willá, Taita Diospa wambrakuna kagta. ¹⁷Paipa wambrakuna kagmanda, Taita Dios iukaskaka Cristo kikipami ka; *chiwanka, nukanchipapasmi niraiá. Nukanchi kai alpapi Cristosina llakii pasagpika, paiwa suma puncha luarpimi kagrisunchi.

Sug luarpi, iapa suma punchapi kagringapa kaskamanda

¹⁸Kasami nini: kai punchakuna kaugsanakunkama iapa llakiikuna pasagpikunapas, nispaka Taita Dios sug luarpi iapa sumami nukanchita kawachingapa ka. Chasa iuiarigpika, chi llakiikuna mana imapas niraiangapa kanchu. ¹⁹Taita Diospa wambrakuna, sumagllami sug luarpi kawarigringapa kanchi. Tukui ima Taita Dios wiñachiskakunapas, askurinti munaspami suianakú, chi puncha chaiangapa. ²⁰Tukui ima Taita Dios wiñachiskakuna, runa pandariskamanda maldisiimi tukurka. Chi wiñachiskakuna kikipa munaimandaka, manima; Taita Dios chasa munagmandami chasa tukugsamurka. ²¹Chasa tukugpipas, Taita Dios pai ima wiñachiskata chasa maldisiskata kispichingapa kagtami iuianchi; chasaka, mana puchukaringapa. Taita Diospa wambrakuna, kispichiska, suma puncha luarpi kaugsai kallarigriurami tukui ima pai wiñachiskakunapas maldisiskata kispichiskallatata tukungapa kankuna.

²²Kasami iachanchi: imasami unguringapa warmi, uchulla iukangapa puncha chaiaura, nanaimanda wakai kallari: chasallatami tukui ima Taita Dios wiñachiskakuna, kunankama wakanakugsina apanakú. ²³Kasapas. Nukanchi kikinkunapasmi, Santu Ispirituwa kaspá, iuiapi uchinanakugsina llakii iukanchi. Santu Ispirittuta iukagmanda nukanchita kawachinmi, suma luarpi imapas chaskigringapa kagtakuna. “Nukapa wambrakunami kangichi” Taita Dios nukanchita kaiangapa puncha chaiangapa, askurinti iuiailami suianakunchi. Chi punchami nukanchipa kuirputapas sumaiachiska kangapa ka. ²⁴Chasa suianakuskawami kispichii tukurkanchi. Ima suianakuskata ña makipi charinakuspaka, ¿imatak mas suianakusunchi? ²⁵Ikuti ima iukangapa suianakuska manara chaimugpika, iukanchimi chi iuiaita upalla suianakunga.

²⁶Nukanchi sambaiaskasina kaura, Santu Ispiritullatami aidá. Mana iachanchichu, imasa chaiakuskasina Taita Diusta mañangapa. Chasa

kagpipas, kikin Santu Ispiritumi nukanchimanda paita mañá. Mana rimai pudigsinami wakaspa mañá. ²⁷Taita Dios, tukuikunapa iuiaita iachagmi iachá, Santu Ispíritu ima mañakugta. Santu Ispíritu, Taita Dios ima munakuskasinami Taita Diospalla kagkunamanda mañá.

Cristowa, nukanchi tukuipi binsigkuna kaskamanda

²⁸Kasami iachanchi: allilla u mana allilla pasarigpipas, Taita Diosmi chasa ni, paita *kuiagkunamanda allillapa tukungapa. Pai imasa munaskasina kawaspami nukanchita kaiarka. ²⁹Pai ñugpamandata rigsigkunatami agllarka, pai kikinpa wambrasina kangapakuna; chasaka paipa wambra, achka waugkindi i panindikunamanda mas atun kangapa. ³⁰Taita Dios ñugpamandata agllaskakunatami kaiá. Kaiaskakunataka ninmi: “Kamkuna, mana pandarigkunami niraiapuangichi”. Chasa niraiaskakunataka, paipa suma puncha luarmami pusá, sumaiachingapa.

³¹Chasa kagpika, ¿imatak nisunchi? Taita Dios nukanchiwa kagpi, ¿pitak pudinga, nukanchimanda kuntra kanga? Ñi pipas manima. ³²Taita Diosmi kikinpa wambrata mana michaspalla kachamurka, tukuikunamanda wañuchii tukungapa. Nigpika, ¿manachu paiwa nukanchita tukui allilla chasallata karangapa ka? ³³Taita Dios kikin agllaskakunata, ¿pitak pudinga, paikuna ima pandariikuna iukagta ningapa? Ñi pipas manima. Taita Dios kikinmi timpu paikunamanda niska karka: “Cristo wañuchii tukuskamandami mana pandarig niraiangapa kankuna”. ³⁴Nigpika, ¿pitak pudinga, nukanchita diltudupa ninama sitangapa? Ñi pipas manima. Jesucristo, wañuchii tukuspa kaugsarisipami Taita Diospa alli ladu kagrí; paimi nukanchimanda tukui sumaglla mañaku. ³⁵Cristo nukanchita iapa kuiagmanda, ¿pitak pudinga, nukanchita paiwa kaskamanda anchuchingapa? Llakii, ñi nanai, ñi iarkai, ñi mana katanga iukai, ñi manchai, ñi jiru iuiaspa kalpachigkuna ñi wañuchigkuna, ñi pipas mana pudingapa kanchu, Cristowa kaskamanda nukanchita anchuchingapa.

³⁶Chasallatami ñugpamanda librupi willaraiá, kasa Taita Diusta nispá:

Kammandami nukanchita chisiagta suianakú wañuchingapa.

Ubijata wañuchingapa munanakugsinami

nukanchita kawanakú. ³⁷Tukui chi llakii pasagpikunapas, Cristo nukanchita kuiagmandami tukuipi suma binsispa llugsinchi.

³⁸Chasallata, allillami iachani, Taita Dios, nukanchipa laia Jesucristowa nukanchita kuiagta. Pai kuiagmandami mana imawapas pudiringapa ka, Cristowa kaskamanda nukanchita anchuchingapa.

Chasa, ñi wañuiwa ñi kaugsaiwapas, ñi anjilkunawa ñi kuku wairakunata mandagkunawapas, ñi kunaúra ñi kipama ñi imaurapas, ³⁹ñi sug luarpi ñi kai alpa ukupi ima tiaskakunawapas, ñi Taita Dios sug ima ruraskakunawapas mana pudiringapa kanchu, Cristowa kaskamanda anchuchingapa, Taita Dios nukanchita kuiagmanda.

Taita Dios, Israelmanda runakunata agllaskamanda

9 ¹Nuka, Cristowa iuiarispa kaskamandami sutipa kaskata niikichita, mana llullaspalla. Santu Ispíritu iuiachiwakuskawa, nukapa iuiapi chasallatami mana llullaspalla kasa niikichita. ²Nuka, imaurapas iapa llakiiwami kani. Nukapa llakiipi, sungu nanagtami llakiswa kani. ³Nukapa waugkindi judiukunamandami chasa llakiiwa kani. Paikuna Cristowa tukuntrakuna iuiarispa, Taita Diusta mañantrani, nuka kikinka, Cristomanda anchuchii tukuspa, maldisiskapas tukungapa. ⁴Paikuna, ñugpamanda achala taita Israelpa iawarmi kankuna. Taita Diosmi paipa wambrakunatasina charirka; chasaka, paiwa sumaiachiska kangapakuna. Paikunawami Taita Dios ikuti ikuti allilla tukugsamurka; chasaka, sugllapisina kangapa. Paikunamandami Moisés imasa ruraspa kaugsangapa niraiaskata chaskirka. Chimandaka iachachirkakunatami, imasa ruraskakunawa Taita Diusta kunguringapa chaiagta. Paikunatami Taita Dios nirka: “Nuka agllaska Cristo samungapa kaskata suiangichi”. ⁵Paikunami kankuna nukanchipa ñugpamanda achala taitakunapa wambrakunapa kati wambrakuna. Paikunapuramandami Cristo runa tukugsamurka. Paika, tukuipi iaia mandag Diosmi ka. Imaurapasmi paita iapa suma atun kagta nisunchi. Chasa kachu.

⁶Mana ninichu, Taita Dios, Israelmanda runakunata karangapa niskata mana karagta. Ninimi: ñugpamanda achala taita Israelpa wambrakunapa kati wambrakuna, mana tukuikuna, Diospa ñawipi paipa wambrakuna niraiagta. ⁷Chasallata, ñugpamanda achala taita Abrahampa wambrakunapa wambrakunapas, tukuikuna, Diospa ñawipi paipa wambrakuna mana niraiankunachu. Chasapaka, Taita Diosmi Abrahamta nirka:

Kamba wambra Isaakmandallami

achka wambrakuna niraiapungapa kangi. ⁸Chasa nispaka,

Abrahampa wambrakuna kagmandalla, Taita Diospa wambrakuna mana niraiangapa kankunachu. Taita Dios Abrahamta wambra karangapa niskamanda tiagsamuska wambrapa wambrakunallami paipa wambrakuna niraiangapa kankuna. ⁹Kasami Taita Dios, Abrahamta nirka:

Ima killa chaiamuurami *kutimusa.

Chi killami kamba warmi Sara

kari wambra iukangapa ka.

¹⁰Kasapas. Nukanchipa ñugpamanda achala taita Isaakpa warmi Rebeka, iska kari wambrakunami suuralla iukarka. ¹¹⁻¹²Chi wawakuna manara tiagsamugpita, Taita Dioska Rebekata niska karka: “Ñugpa tiagsamuska wabraka, kati wambra ima niskata ruragmi kangapa ka”, paikuna ima allilla u mana allilla manara ruragpikuna. Chasaka, Taita Dios kikinmi kawachí, maikan paita allilla kawariskata ñugpamandata aglladur kagta. Chasa Rebekata nispaka, kawachirkami, allilla u mana allilla runanakugpipas, pai imasa munaskasina agllagta. ¹³Chasallatami ñugpamanda librupi willaraiá, kasa nispa:

Jakobtami kuiarkani.

Ikuti Esautaka mana munarkanichu.

¹⁴Chasa agllaskamandaka, ¿imatak nisunchi? Taita Dios chasa agllaspaka, ¿mana allillachu rurarka? Ñi imapas manima. ¹⁵Moisestami Taita Dios kasa nirka:

Maikanmanda nuka llakiriskamandami llakirisa.

Chasallata, maikanta nuka kuiangapa munaskatami kuiasa. ¹⁶Chasaka Taita Dioska, runakunata mana agllanchu, paikuna munanakuskamanda u ima allilla ruraskamanda. Taita Dios llakiriskamandallami pai pita munaskata agllá. ¹⁷Chasallatami ñugpamanda librupi willaraiá. Kasami Taita Dios, Ejipto alpapi atun mandagta nirka:

Kasamandami kamta atun mandag kangapa churarkaiki: nuka tukui pudig kagta kam nukamanda kawachingapa; chasallata, tukui alpakunapi nuka Taita Dios kagta iacharigsamungapa. ¹⁸Chasaka, maikanmanda Taita Dios llakiringapa munaskamandami llakirí. Chasallata maikanta iuiái tutaichingapa munaskataka, paillami chasa pudí rurangapa.

¹⁹Chimanda, kamka niwankangichar: “Chasa kaspaka, ¿imapatak Taita Dios, maikan runatapas ni: ‘Mana allilla ruragmi kangi’? Pai ima rurangapa munaskataka, ¿pisik pudinga: ‘Chitaka *mana rurakui’ ningapa?”. ²⁰Kam runa, ¿imatak kangi, Taita Diusta imasa rurakuskata tapuchingapa? Alpata ruraska mangaka mana pudingapa ka, ruragta tapuchingapa: “¿Imapatak chasa rurawarkangi?”. ²¹Alpata imapas ruragka, ¿manachu pudí, chi alpallatata sug kuashagsina atun punchakuna upiadiru ruranga; ikuti sugka, ianga punchakuna upiadiru ruranga?

²²Jiru ruraspa, diltudupa ninama sitai tukungapa kagkunata, Taita Diosmi suiarka, mana piñakuspalla; chasaka, pai rabiarispa, tukui pudig kagta kawachingapa. ²³Chasallata, sugkunamanda llakii iukaspa, ñugpamandatami agllarka, paiwa suma puncha luarpi kagringapa; chasaka, pai askurinti iapa atun suma kagta kawachingapa. ²⁴Chi agllaskapi, nukanchipasmi kanchi. Judiupurakunapi i mana judíu kaskakunapipasmi agllarka. ²⁵Chasallatami Oseas suti Santu Ispirituwa rimag willaska librupi willaraiá, kasa nispá:

Mana nukapa runakuna kaskatami ningapa kani:

“Nukapa runakunami kapuangichi”.

Mana kuiaskatami ningapa kani:

“Nukapa kuiaskami kapuangi”.

²⁶Maipimi nirkani:

“Nukapa runakuna mana kangichichu”:

chillapitami ningapa kani:

“Taita Dios kaugsagpa wambrakunami kapuangichi”. ²⁷Ikuti

Israelmanda runakunamandaka, Isaías suti Santu Ispirituwa rimag, kasa nispami willá:

Ñugpamanda achala taita Israelpa wambrakunapa wambrakuna
kaskajusina achka mana kuintangasina kagpikunapas,
maillakunallami kispiringapa kankuna.

- ²⁸ Atun Taita Dius, kai alpapi ima rurangapa niskata
mana unaillami justisiagsamungapa ka. ²⁹ Isaiasllatami ñugpata
willaska karka, kasa nispā:
Tukui manduiug atun Taita Dius mana sakinmi,
kati kati wambrakuna tiangapa;
nukanchipas, Sodoma i Gomorra suti puiblukunasinami ña
puchukariska kanchi.

Achka judiukuna, Alli Willaita mana uiaskakunamanda

³⁰ Chasa kagmandaka, ¿imatak nisunchi? Mana judíu kagkuna, Taita
Diuspa ñawipi alli kangapa mana maskanakugpipas, paikuna Cristowa
suma iuiaripa kagmandami mana pandarig tukugsamunkuna. ³¹ Ikuti
Israelmanda runakunaka, Moisés ima rurangapa willaskata katichiraiaspapas,
mana pudirkakunachu, Taita Diuspa ñawipi allilla tukungapa. ³² ¿Imapatak
mana chasa pudirkakuna? Cristowa iuiaringataka, Moisés ima rurangapa
willaraiaskallata katichiraiaspami mana pudirkakuna, Taita Diuspa ñawipi
allilla tukungapa. Imasami runakuna, rumipi takaripa urmankuna: ñallapas
chasallata Cristo kruspi wañuskamanda, paikunata iapa mana sumami
uiarigsamurka. ³³ Chasallatami ñugpamanda librupi willaraiá, kasa nispā:
Kawamuichi. Sión lumapi,
atun rumisina runatami churani,
runakuna paíta takaripa urmagsina tiangapa.
Ikuti maikanpas paiwa suma iuiaripa kagkunamandaka,
Taita Dius manami kungaringa.

10 ¹ Taitakuna i mamakuna, tukui iuiaiwa iapa munaspami Taita
Diusta mañakuni, Israelmanda runakuna kispichii tukuchukuna.
² Paikunamanda willanimi: askurintimi munanakú, Taita Dius ima niskata
rurangapa. Chasa munanakugpipas, pai ima munakuskataka manara allilla
iachankunachu. ³ Manara iachankunachu, imasamanda Taita Diuswa mana
pandarig niraiagtakuna. Mana chasa iachaspami munanakú, kikinkunapa
allilla ruraikunallawa mana pandarig niraiangapakuna. Chasa iuiaspami
Taita Dius ima niskata mana munarkakuna suma uiangapa. ⁴ Moisés tukui
ima rurangapa niraiaskaka, Cristopimi puchukarirka; chasaka tukuikuna
paiwa suma iuiarigkuna, mana pandarig niraiangapa.

⁵ Moisés ima niskata ruraspa, mana pandarig niraiangapa kaskamandaka,
Moisés kikinmi kasa nirka: “Tukui ima niskata ruragkunami kaugsai iukagta
niraiangapa kankuna”. ⁶ Ikuti Cristowa suma iuiaripa, mana pandarig
niraiangapa kaskamandaka, kasami willaraiá: “Kamba iuiaipei *mana ningi:
‘¿Pitak sug luarma sikanga?’” Cristota nigringapa: “Uraikumui”. ⁷ “Chasallata,

kamba iuiiaipi kasapas *mana ningi: ‘¿Pitak alpa ukuma uraikunga?’” Cristota nigringapa: “Wañuskakunapagmanda llugsimui”. ⁸Chasapaka, kasami willaraiá:

Diuspa Rimai, kamba ladullapimi ka.

Kam kikinpa simiwami pudingi rimanga.

Kam kikinpa iuiaiwami pudingi iuiaringa.

Chi Rimaitami willanchi, Cristowa suma iuiaringapa. ⁹Kamkunapa simiwa willaspami iukangichi, Jesús nukanchipa iaia kagta ninga. Kamkunapa iuiaiwami iukangichi suma iuiaringa, pai wañuskata, Taita Dios kaugsachiska kagta. Chasa iuiaiwa kagmandami kispichii tukungapa kangichi. ¹⁰Kamkunapa iuiaiwa Jesucristowa suma iuiariskamandami mana pandarig niraiangichi. Simiwa Jesucristomanda willagmandami kispichii tukungapa kangichi.

¹¹Chasallatami ñugpamanda librupi willaraiá, kasa nispa: “Paiwa suma iuiaripa kagkunamanda, Taita Dios manami kungaringa”. ¹²Judiukuna i mana judfu kagkuna, sug rigcha sug rigcha mana niraianchu. Jesucristo, tukuikunapa iaiami niraiá. Tukuí paiwa suma iuiaripa mañagkunata, mana michaspallami ima mañaskata karamú. ¹³Chasallatami willaraiá, kasa nispa:

Atun Taita Dioswa tukui suma iuiaripa mañagkuna

kispiriskami tukungapa kankuna.

¹⁴Paiwa mana iuiarispalla kaugsanakuspaka, ¿imasatak paita mañangakuna? Paimanda ñi ima mana uiaspaka, ¿imasatak paiwa iuiaringakuna? Ñi pipas mana paikunata Alli Willaita willagrigpikunaka, ¿imasatak iachangakuna? ¹⁵Paikunapagma Taita Dios ñi pitapas mana kachagpika, ¿pitak willagringa? Chasallatami willaraiá, kasa nispa:

Maikanpas Alli Willaita willangapa chaiamugpika,

iapa allimi uiarigsamú.

¹⁶Maituku Alli Willaita willanakugpipas, mana tukuikuna munankunachu, chi willaita uangapa. Chasallatami Isaías kasa niska karka:

Taitiku, ¿pikunatak munarkakuna,

nukanchi ima willaskata suma uangapa?

Maillakunalla. ¹⁷Chasamanda, Alli Willaita uiaspami Cristowa iuiarii pudinchi. Chi Alli Willaita, pai kikin Cristo kachamuskami niraiá.

¹⁸Chasa niraiagpipas, nuka tapuni: ¿manachu Alli Willaita uiarkakuna? Chitaka allillami uiarkakuna. Chasallatami willaraiá, kasa nispa:

Chi rimai, tukui kai alpapimi uiarigsamurka.

Maipi runakuna tiaskapipasmi iacharigsamurka.

¹⁹Kasapasmi tapuni: chasa kagpika, Israelmanda runakunaka, ¿manachu chasa iacharkakuna ima niraiagta? Ñugpata, Moiseska kasami nirka:

Atun Taita Diosmi ni:

“Mana nukapa runakuna kaskata nuka agllaska kagmandami iuiachingapa kaikichita,
paikunata mana allilla iuiaspa kawangapa.
Nuka, mana iuiaiiug runakunata agllaspa kagmandami

rabiachingapa kaikichita”.

²⁰Isaiaspas, mana manchaspallami kasa nirka:

Atun Taita Diusmi ni:

“Mana maskawanakugmi
tariwarkakuna.

Mana nukamanda tapunakuskatami kawarirkani”.

²¹Ikuti Israelmanda runakunamandaka kasami nirka:

Nuka ima niskata mana uiawaspa piñarispalla kagkunataka chisiagtami
iskandi makikunawa

chaskingapa suiakurkani.

Israelmanda runakuna, maillakuna Cristomanda agllai tukuskakunamanda

11 ¹Chasa kagmandaka, ikuti tapusa: Taita Dius, ¿pai agllaska
runakunatachu wabutirka? Ñi imapas manima. Nukapasmi
Israelmandapura kani. Nukapa ñugpamanda achala taita, Abrahammi
karka. Paipa wambra Benjaminpa iawarmi kani. ²Taita Diuska, pai
ñugpamanda agllaska runakunata mana wabutirkachu. Ñugpamanda
librupi, Elías suti Santu Ispirituwa rimagmanta willaraiaskata,
¿manachu iachangichi? Paika, Taita Diusta mañakuspa, Israelmanda
runakuna mana allilla kagtakuna willaspa, kasami nirka:

³Taitiku, kamba Santu Ispirituwa rimagkunatami wañuchirkakuna.

Kammanta rupachidiru altarkunatapasma wagllichirkakuna.

Nukallami *chara kausa kani.

Nigpika, nukatapasma wañuchiwangapa munanakú. ⁴Chiura Taita

Diuska, kasami paita ainirka:

Baal suti ianga diuspa ñugpa ladu mana kunguringapa,

kanchis waranga runakunatami nukamanda wakachirirkani.

⁵Kuna punchakunapas, chasallatami Taita Dius, Israelmanda runakunata
suma kuiaspa, maikankunata agllaku. ⁶Taita Dius, paipa iapa suma kuiaiwami
agllaku; mana kanchu paikuna ima allilla ruraskamanda. Allilla ruraskamanda
Taita Dius agllakugpika, pai suma kuiaska, ñi imapaschar mana niraiantira.

⁷Chasa kagmandaka, ¿imatak nisunchi? Israelmanda runakuna
maskarinakurka, mana pandarig tukungapa. Nigpika, manima
chasa tarirkakunachu. Taita Dius agllaskakunallami mana pandarig
tukugsamurkakuna. Ikuti chi sugkunataka paikunapa iui ai tutaichiskasinami
tukugsamurkakunata. ⁸Chasallatami ñugpamanda librupi willaraiá, kasa nispas:

Taita Dius, paikunata iapa puñuipisina iukangapami iuiachirka;

*chiwanka, ñawiwa kawasppas,

mana kawagsina tukungapa;

rinriwa uiasppas,

mana uiagsina tukungapa.

Kunankamami chasa runakuna tiankuna. ⁹Davidpas, kasami chi runakunamanda nirka:

Moisés ima rurangapa willaska,
paikuna suma achka mikui iukagsinami ka.
Chi willaraiaskapi urmangapa waskakunasina
u tugllasinami tukupungapa kankunata.
Chi tugllapi urmagkunataka
diltudupa ninamami sitai tukungapa kankuna.

¹⁰ Paikunapa ñawi wichkaskasinami tukugsamungapa ka;
chasaka, mana kawagsina tukungapakuna.
Wasa pakiskasinami
patariska imaurapas kangapa kankuna.

Mana judíu kagkuna, kispiringapa pudiskamanda

¹¹ Mana kagpika, ikuti tapusa: judiukuna chasa Cristomanda takarigsina ruraspa, ¿diltudupachu urmaskasina tukurkakuna? Ñi imapas manima. Kikin judiukuna Cristota mana uiaskamandami mana judíu kagkunaka pudinkuna kispiringapa; *chiwanka judiukuna, chasa kawaspa, paikunasinallatata Cristowa tukugsamungapakuna. ¹² Judiukuna Cristota mana uiaspa sitai tukugmandami mana judíu kagkunaka, Taita Dioswa iapa iukagsina tukugsamurkakuna. Tukui judiukuna Taita Dioswa ikuti tukugsamuuraka, askurinti iapa suma allillami tukugsamungapa ka.

¹³ Kunauraka, kamkuna mana judíu kagkunatami kasa niikichita. Cristo kikinmi nukata kachamuwarka, mana judíu kagkunata Alli Willaita willaspa puringapa. Chimandami, nukapa suma alli iuiaita suma iuiarispas, chita willaspa purikuni, ¹⁴ kasa munaspa: iamalai nuka kikinpa runakunapas munantrakuna, kamkunata kawaspa, Cristowa tukugsamungapakuna; chasaka, kispiringapakuna! ¹⁵ Taita Dios, judiukunata wabutispa, mana judiukunatami agllarka; chasaka, tukuikuna paiwa pasinsiachirispas kangapakuna. Judiukunata Taita Dios ikuti kaiauraka, ¿imatak niraiangapa ka? Wañuska kaspa, kaugsariskami niraiangapa ka. ¹⁶ Kasapas. Ñugpa ruraska tanda Diuspalla niraiangapa kagpika, tukui tanda rurangapa chapuskapasmi paipalla niraiangapa ka. Chasallata, sacha angu Diuspalla niraiangapa kagpika, malkikunapasmi paipalla niraiangapa ka.

¹⁷ Alli olivos sachamanda sug malkikunata kuchuskasinami sug judiukunaka tukurkakuna. Ikuti kamka, mana judíu kaspa, sachukupi wiñaska olivos malkisinami kangi. Chi malkita apaspa, alli olivos kuchuska malkima tarpuskasinami llutaska kangi. Chasaka, chi alli olivos sacha angukunawa Diospa kaugsaiwami kallarikang. ¹⁸ Chimanda, iujalallapas iuiakungi: “Alli olivos sachamanda kuchuska malkisinakunamanda mas allimi kani”! Chasa iuiaspaka, iuiarii, kamka mana anguta charig kagta. Chasapaka iuiarii: angukunami kamta charig kankuna.

¹⁹Kasachar niwantrangi: “Chi malkikuna kuchugsinami tukurka, nukata chima tarpugsina llutaspa rurawangapa”. ²⁰Ari. Judiukuna mana Cristowa iuiarigmandami chi sacha malki kuchugsina tukugsamurka. Ikuti kamka, paiwa suma iuiariskamandallami chi kuchuskama tarpuskasina llutaspa tukugsamurkangi. Chimanda, *mana atun tukungi. Chasapaka, Taita Diusta suma kuiaspa manchaspalla iuiakungi. ²¹Imasami Taita Dios, chi sacha kikinpa malkisinakunata mana chillapi sakirka: kampasmi chasallata pudingi pasanga, mana allilla kagpika. ²²Chimanda iuiarii, Taita Dios iapa alli kagta; chasallata, iapa rabiariig kagta. Paita mana uiagkunata iapa rabiariigmi ka. Ikuti kamwaka iapa allimi ka. Chasa kagmanda, kamka iukangimi, mana kungarisipalla, Taita Dios kamwa iapa alli kagta iuiarispalla kanga. Kungarigpika, kampas chi sachamanda malki kuchuskasinami tukunkangi. ²³Chi judiukuna Cristowa mana iuiarigkuna paita uiagsamugpikunaka, Taita Dios, chi sachamallatatami paikunata ikuti tarpugsina llutaspa ruragsamunga. Taita Diosmi pudí, chasallata ruragsamungapa. ²⁴Sachukupi wiñaska olivos sachamanda malkita kuchuspa, alli olivos sachama tarpugsina llutaspa kamta rurarka. Mana chasa rurangapa pudiringasina kagpipas, allillami chasa rurarka. Taita Dios, kamta chasa ruraspaka, imanachu mas allilla pudinga, chi alli olivos sachama judiukunata ikuti tarpugsina llutaspa ruranga? Ari.

Israelmanda runakunatapas, Taita Dios kispichingapa kaskamanda

²⁵Taitakuna i mamakuna, munakunimi, manara pipas iachaskata kamkuna iachangapa; chasaka, kamkuna mana iuianakungapa: “Nuka, tukuimi iachani”. Israelmanda runakuna maikankunata iuiiai tutaiachiskasiniami tukurkakunata; chika, mana judiukunata maituku achka agllaska, Cristowa tukugsamunkama. ²⁶Chasa tukugsamuurami tukui Israelmanda runakuna kispiringapa kankuna. Chasallatami ñugpamanda librupi willaraiá, kasa nispá:

Sión lumamanda, kispichigmi samungapa ka.

Paika, ñugpamanda achala taita Jakobpa wambrakunapa
wambrakuna jiru ruraskakunatami

kispichigsamungapa ka.

²⁷Nuka ñugpata paikunawa iuiaripa rimaskaka,
kasami tukungapa ka:

paikuna mana allilla ruraskakunata nuka pasinsiaura.

²⁸Israelmanda runakuna, Alli Willaita wabutispa, Taita Diusta manami munagsamurkakuna; chasaka, kam mana judíu kagkunamanda allilla tukungapa. Chasa kagpipas, paikunapa ñugpamanda achala taitakunata Taita Dios agllaskamandami paipa kuiaska *chara kankuna. ²⁹Taita Dios ima karaskata mana kichunchu. Pai kikin agllaskakunata mana wabutinchu. ³⁰Chasallata, imasami kamkuna, ñugpata mana Taita Diusta uiarkangichi; ikuti kunaauraka, judiukuna paita mana uianakugmanda, pai kamkunamanda suma kuiaspa llakirirka: ³¹chasallatami, judiukuna kunaaura

mana paita uiagkuna kagpipas, mas nispa paillatata ikuti judiukunamanda llakiringapa ka; imasami kamkunamanda llakirirka: chasallata.

³²Tukuikunatami Taita Dios sakirka, paita mana uiagkuna kangapa; chasaka, tukuikunata suma kuiaspa llakirispas, pai kikin kispichingapakunata.

³³Taita Dios, ña askurinti sumami kuiá. Ña askurinti iuiiai iachami ka. Pai ima iuiakuskata, ñi pipas mana iachangapa pudinchichu. Mana imapas pudinchichu, pai ima rurakuskata iachangapa ima niraiagta.

³⁴Chasallatami ñugpamanda librupi willaraiá, kasa nispa:

Atun Taita Dios ima iuiakuskata, ñi pipas mana iachanchu.

Paita ñi pipas mana imapas iuiachinchu.

³⁵Ñi pipas mana paita imapas ñugpa kararkachu, pai kutichingapa. ³⁶Tukuimi paimanda karaska tia. Paimi tukui rurarka. Pai kikinmandami tukui ruraska tia. Paita imaurapas iapa suma atun kagta nisunchi. Chasa kachu.

Taita Diosmandalla sumaglla kaugsangapa

12 ¹Taitakuna i mamakuna, Taita Dios suma kuiaspa llakiskamandami kasa mañaikichita: kam kikinkuna, Taita Diusta kamarikusina iukachiriichi, paimandalla kaugsangapa; chasaka, pai suma kuntintulla kamkunata kawangapa. Chasami kamkunata chaiaku, tukui iuiaiwa Taita Diusta suma atuniachingapa. ²*Mana kaugsaiichi, kai alpamandakunallawa iuiarispas. Iukangichimi, Taita Dios kamkunapa iuiaita sug rigcha iuiachiskakunawa mas suma iuiarispas kaugsangakuna. Chasa kaugsaspaka, iachankangichimi, Taita Dios ima munakuskata rurangapa. Paipa ñawipi sumaglla kagta kawachispami tukuipi allilla ruraspa iukangichi kaugsanga.

³Taita Dios suma kuiawaskamandami tukui kamkunata kasa niikichita: imasa kikinmanda iuiiai iukaskamanda mas atun *mana iukangichi iuianga. Chasapaka, imasami Taita Dios, pai imasa munaskasina sug sugta karamú, paiwa suma iuiarispas kangapa: chasallatami iukangichi iuiaringa. ⁴Imasami suglla kuirpupi, chaki, maki, uma, imapas achka iukagpipas, sug sug rigcha, sug sug rigcha rurankuna: ⁵chasallatami nukanchipas, achkakuna kaspapas, Cristowa suglla kagsina kanchi. Nukanchi tukuikunami suglla kuirpu niraianchi.

⁶Taita Dioska, nukanchita sugta sug rigcha, sugta sug rigcha, pai imasa munaskasinami karamú, nukanchi kikinpura aidanakuspa kaugsangapa. Pai kikin Santu Ispirituwa rimangapa karamugpika, pai imasa iuiachiskasina willasunchi, paiwa suma iuiarispas. ⁷Sugkunamanda tukuipi allilla rurangapa karamugpika, paikunamanda allilla suma rurasunchi. Sugkunata iachachingapa karamugpika, paikunata allilla iachachisunchi. ⁸Sugkunata sumaglla iuiachingapa karamugpika, paikunata sumaglla iuiachisunchi. Kulki u imapas karangapa chaiagpika, *mana karagsina iuiarispas karasunchi. Mandag kangapa chaiagpika, allilla iuiarispas suma mandachu. Ministiskakunata suma kawaspa, imapas karangapa chaiagpika, alli iuiachiiwa karasunchi.

Cristowa tukuskakuna, imasa Diosmandalla kaugsai iukaskamanda

⁹Tukui iuiwai sutipa allilla *kuianakuichi. *Mana munaichi jiru ruraikunata. Ikuti tukui allilla ruraikunataka suma ruraspa kaugsaiichi. ¹⁰Waugkindikunasina parijuma *kuianakuichi. Sugkunata: “Nukanchimanda mas allimi ka” kam kikinpuramanda iuiarispa kaichi.

¹¹Ima ruraikunapas allilla ruraichi, mana killaspalla. Iaia Jesús imasa munakuskasina tukuipi allilla iuiarispa ruraichi.

¹²Paita suma iuiwai suiaspa, alli iuiachiwa kaichi. Iapa llakiikuna chaiamugpika, mana llakiwa kagsina kawachiichi. *Mana sakiichi, Taita Diusta mañasa kaugsangapa.

¹³Taita Diospalla kagkunata ima ministiriska karaichi. Kamkunapa wasima pipas chaiagrigpika, sumaglla “Taikui” niichi. ¹⁴Kamkunata jiru rurangapa iuiaspa kawagkunataka niichi: “Taita Dios, kamta iapa kuiaspa kawapuachu”. Paikunata mana randichingapa iuiachi. Chasapaka, Taita Diusta paikunamanda mañapuichi.

¹⁵Alli iuiachiwa kagkunawa kangapa chaiagpika, chasallata alli iuiachiwa kaichi. Chasallata, wakanakuskawa kangapa chaiagpika, paikunawa llakii iukaichi.

¹⁶Kam kikinpura sugllasina iuiarispa kaugsanakuichi. Atun tukugsina iuiarispa *mana kaichi. Chasapaka, uchulla kaskakunawa sugllapi tukuichi. *Mana iuiarispa kaichi: “Nuka, tukuimi iachani”.

¹⁷Kamkunata mana allilla ruragkunataka *mana randichiichi. Iuiariichi, tukuikunapa ñawipi allilla ruraspa kaugsangapa. ¹⁸Kamkunata imapas rurangapa chaiagpika, allilla ruraichi; *chiwanka, tukuikunawa sumaglla kaugsanakungapa.

¹⁹Nukapa *kuiaskakuna, kamkunata mana munagkunataka *mana chasallata randichiichi. Chasalla sakiichi. Taita Diosmi paikunata justisiangakunata. Chasallatami ñugpamanda librupi willaraiá, kasa nispa:

Atun Taita Diosmi ni:

“Nukami justisiasa.

Paikuna jiru ruragpikunaka,

nukatami chaiawaku,

chasallata paikunata rurangapa”. ²⁰Ikuti:

Kamta mana munag iarkaiwa kagpika,

kam iukangimi mikui karanga.

Iakunaiwa kagpika,

iukangimi upiangapa karanga.

Kam chasa allilla ruragpika,

paitaka ñawi rugarispa,

pingaisinami iuiachinga. ²¹Kamta ima jirukuna rurangapa iuiaita

*mana sakiringi. Chasapaka, alli ruraikunawa jiru iuiaikunata

binsingi.

13 ¹Tukuikunami iukanchi, mandagkuna ima niskata uianga. Mandagkunata Taita Dios mana churagpika, ñi pipas manachar tiantra. Kunaura mandagkunaka, Taita Dios churaskakunami kankuna. ²Chimanda, chi mandagkunata mana uiagkunaka, Taita Dios mandangapa churaskatami wabutinkuna. Chasa mana uiagkunaka justisiaimi tukungapa kankuna. ³Mandagkunaka, alli ruragkunata manchachingapa mana kankunachu. Mana alli ruraspa kaugsanakuskata manchachingapami churaska kankuna. ¿Manachu munangichi, mandagkunata mana manchaspalla kaugsangapa? Chasa munaspaka, allilla ruraspa kaugsaichi. Chasa kaugsagpika, mandagkuna kamkunata ningapami kankuna: “Alli runami kangi”. ⁴Mandagkunaka, Taita Diusta aidagkunami kankuna, kamkuna allilla kaugsangapa. Kamkuna imapi mana allilla ruraspa, iukangichimi manchaspaka kangakuna. Mandagkuna, Taita Diusta aidag kaspaka, mana ianga barata charirinkunachu. Mana allilla ruragkunamandaka asutigkunami kankuna. ⁵Chimandami chaiá, paikuna ima niskata uiangapa. Asutii tukungapa manchaspalla, manima; kamkunapa alli iuiapi iuiarispami iukangichi chasa uianga. ⁶Paikuna mandagkuna kagmanda iukangichimi, paikunata kulki paganga. Mandagkuna, Taita Diusta aidagkuna kaspaka, iukankunami imaurapas paikunata imasa chaiaskasina ruraspa kaugsanakunga.

⁷Tukui mandagkunata imasa chaiaskasina kuaichi. Impuistu chaskigta kulki kuaichi. Rama^a mañagtaka rama kuaichi. Suma kuiangapa chaiaskataka suma kuiaichi. Suma rimai iukaskataka suma rimaichi.

⁸*Mana pitapas dibiichi. Iukaichi dibisinaka, kam kikinpura sumaglla *kuianakuspa kaugsangapaglla. Sugkunata *kuiagkuna, tukui ima Moisés niskata allilla ruragkunami niraiankuna. ⁹Chi niskapi, kasami willaraiá: “*Mana sugpa warmiwa kariwa siriringi. *Mana pitapas wañuchingi. *Mana sisangi. [*Mana pimandapas llullangi.] Sugkuna iukaskakunata *mana munaringi”. Sug mandaikunapasmi tia. Chasa tiagpipas: “Kam kikintasinami iukangi, tukui runakunatapas *kuianga”; chasa ruragpika, tukui ima Moisés niskata allilla ruragkunami niraiankuna. ¹⁰Chasa *kuiagkuna, mana pitapas jiru rurangapa iuiankunachu. Chimandami, chasa *kuianakuspa kaugsanakugmanda, tukui ima Moisés niskata allilla ruragkuna niraiankuna.

¹¹Kasapas iuiariichi: kuna punchakuna imasa kagta. Nukanchi Iaia Jesucristowa suma iuiaringapa kallariska, kunaaurami kispichii puncha sutipa ña chaimuku. Chimanda, puñunakugsina niraiagkuna rigchariichi. ¹²Tuta ña pakarii tukugsinami chaimuku. Chimanda, iana tutapisina mana allilla ruraikunata sakisunchi. Wañuchinakudiru katanga churarigsina tukusunchi; chasaka, punchapisina kaugsangapa. ¹³Punchapi purinakugsina, tukuipi allilla ruraspa kaugsanakusunchi. *Mana kaugsasunchi, iapa mikuspa i machagta upiaspa. Chasallata, maikan kari warmiwa pandarispaka i jiru

^a 13.7 Rama kuangapa niraianni imasa chaiaskasina kuntribusiun kuangapa.

ruraikunata ruraspa *mana kasunchi. Mana piñachirinakuspalla i sugkunata jiru iuiwaiwa mana kawaspalla kasunchi. ¹⁴Chasapaka, Iaia Jesucristopa iuiaita churarigsina tukungichi. *Mana iuiangichi, kam kikinkunapa kuirpupi ima jiru iuiaskasina rurangapa.

Cristowa sug tukuskakunata *mana piñasunchi

14 ¹Manara Cristota allilla rigsigkunata sumaglla chaskiichi, mana imapipas llakichinakuspalla. ²Cristowa tukuskakuna, maikankuna iuiankunami, tukui mikui, mikudiru kagta. Ikuti sugkunaka, manara Cristota allilla rigsispa, iuiankunami, aicha mikuspaka, pandarig niraiagta. ³Tukui mikuikunata mikugka, aicha mana mikugta *mana wabutichu. Chasallata aicha mana mikugka, tukui mikuikunata mikugta *mana ñi imapas nichu. Taita Diusmi iskandikunata ni: “Allillami ka”. ⁴Kam, ¿imapatak sug patrunpa lutrinta ningi: “Mana allilla ruraspami kangi”? Pai allilla u mana allilla rurakuskata, kikin patrunmi iuká kawanga. Chasa kagpipas, Iaia Jesusmi paita aidanga, allilla tukugsamungapa. Chimandami mikug u mana mikug kaskakunata pai ningapa ka: “Allillami ka”.

⁵Kasapas. Sugkuna iuiankunami, sug puncha, sugkunamanda mas atun wardadiru tiagta. Ikuti sugkunaka iuiankunami, ñi imapas mana atun wardadiru puncha tiagta. Kamkuna imasa mas suma rurangapa iuiariskata ruraspa kapuaichi. ⁶Maikanpas wardadiru puncha samakuspaka, Iaia Jesusmanda iuiarisa samachu. Tukui mikuikunata mikugka, Taita Diusta: “Pai Siñur” nispas, Iaia Jesusmanda iuiarisa mikuchu. Aicha mana mikugpas, Iaia Jesusmanda iuiarisa *mana mikuchu. Paipas, Taita Diusta: “Pai Siñur” nichu.

⁷Ñi pipas mana kaugsanchichu nukanchimandalla. Chasallata wañuipas, mana nukanchimandalla wañunchichu. ⁸Kaugsanakunkama, Iaia Jesusmandami kaugsanakunchi. Wañuurapas, Iaia Jesusmandami wañusunchi. Chasapika, kaugsanakuspa wañuurapas, Iaia Jesuspallami kasunchi. ⁹Iaia Jesucristo, wañuspaka, kikinmi kaugsarirka; chasawaka, wañuskakunata kaugsagkunatapas iaia mandag kangapa.

¹⁰Nigpika kamka, ¿imapatak Cristowa tukuskakunata nikungi: “Kam, mana allilla ruraspami kangi”? ¿Imapatak paikunata wabutikungi? Tukuikunami iukanchi, Taita Diuspagma chaiagringa. Chipimi allilla u mana allilla ruraskakunata kawachii tukusunchi. ¹¹Chasallatami ñugpamanda librupi willaraiá:

Atun Taita Diusmi kasa ni:

“Nukapa kaugsaiwami sutipa kasa nini:

Tukuikunami nukapa ñugpa ladu kunguriwangapa kankuna.

Tukuikunami niwangapa kankuna:

‘Kam, tukuimanda mas alli, mas suma, tukuikunapa iaiami kangi’.”

¹²Chasaka, tukuikunami iukanchi, Taita Diuspa ñawipi ima ruraskakunata willarigringa.

¹³Chimandami iukanchi, parijuma mana pitapas ninakunga: “Mana allilla ruraspami kangi”. Chasapaka, kasa iuiarisunchi: Cristowa tukuskakunata *mana imapipas pandachispa, pandariipi urmachisunchi. ¹⁴Iaia Jesusmanda iuiarispas, iachanimi, ñi ima mikui, Diospa ñawipi mapasina mana kagta. Ikuti maikanpas: “Mapami ka” iuiarigpika, chasa iuiarigmanda mapami niraiapunga. ¹⁵Kam, sug waugki pandarig niraiaska mikuita paipa ñawipi mikukugpika, mana parijuma *kuianakugsinami tukungi. ¡Amalai kam chasa mikukuskata kawaspaka, chi runa Cristowa iuiakuskata sakintrá, Cristo paimanda wañugpipas! ¹⁶Chimanda, kamkuna tukui mikuikunata mikug kagpipas, *mana tiachu ñi pipas kawaspa, ningapa: “Chika, mana allilla kanchu”. ¹⁷Taita Dios ima niskata ruraspa kaugsangapaka mana niraianchu kasa u chasa mikuspa upiaspa kaugsangapa. Santu Ispirituwa alli iuiachiiwa allilla ruraspa, sumaglla kaugsangapami niraiá. ¹⁸Chasa kaugsaspa, Cristo ima niskata ruragka, Taita Diusta sumagllami kuntintachí. Chasa allilla ruragmandami maikan runapas ninkuna: “Pai, allimi ka”.

¹⁹Chimanda maskasunchi, imapipas tukuikunawa sumaglla kaugsanakungapa; chasaka tukuikuna, alli suma iuiái iuiachinakuspa kangapa. ²⁰Kam ima sugkunapa ñawipi mikuskamanda, iujalallapas Taita Dios paikunata suma ruraska kaskata puchukagsina rurakungi! Tukui mikui, mikudirumi niraiá. Chasa niraiagpipas, kam ima mikukuskata sug waugki, kawaspa, nichu mana allilla kagta: *chiwanka, sutipami kammanda mana allilla tukunga. ²¹Cristowa tukuskakuna mana pandaringapa, mas allilla kantra, aicha mana mikungapa, binu mana upiangapa, ñi imapas pandachigsina mana kangapa. ²²Kam ima mikudiru iuiakuskata Taita Diospa ñawillapi iuiakungi. Maikanpas, mikukuspa, paipa iuiapi mana tiachu imapipas mana allilla ruraska kagta: chi runaka, Taita Diospa iapa kuiaskami ka. ²³Ikuti maikanpas, mikukuspa tapurikuchu: “Kai mikui, ¿allilla u mana allillachu ka?”: paika, ña pandarigmi tukú. Ima rurai pipas alli kagta suma iuiaringataka, sug rigcha iuiarispas ruragpika, paika pandariipimi ña urmaska niraiá.

Iuiarisunchi, sugkuna allilla kangapa

15 ¹Nukanchi Cristowa suma iuiarispas kagkunaka iukanchimi, manara paita allilla rigsikgunata, paikuna ima iuianakuskamanda ñi imapas mana ninga. Nukanchi kuntintarispas kangapa *mana iuiarisunchi. ²Tukuikunami iukanchi iuiaringa, sugkunapas allilla kangapa; chasaka paikunapas, alli suma iuiái iuiachii tukungapakuna. ³Cristopas mana iuiakurkachu, kikinlla kuntintarispas kangapa. Nigpika, kasami ñugpamanda librupi paimanda willaraiá: “Kamta kamispa rimaskakunaka, nukatami chaiawarka”. ⁴Taita Diosmi ñugpamandata tukui iskribichirka, nukanchita iachachingapa. Chi willaraiaskapi nukanchi iachaikuspaka, iukanchimi, sumaglla iuiachirispalla, chi iuiailawa mana sakispalla suiangakuna. ⁵Taita Diosmi sumaglla nukanchita iuiachimú, mana sakispalla kaugsangapa. Paimi kamkunata iuiachimú, kam kikinpura

suglla iuiwai kaugsanakungapa; imasami Jesucristo kaugsarka: chasallata.
⁶Chasaka, sugllapi suglla rimagsina, nukanchipa Iaia Jesucristopa Taita Diusta ningichi: “Kam, iapa suma atunmi kangi”.

Mana judíu kagkunata, Alli Willaita willaskamanda

⁷Chasamanda, imasami Cristo, kamkunata suma chaskirka: chasallata kam kikinpura suma chaskinakuichi; chasawaka, Taita Diusta ninakungapa: “Kam, iapa suma atunmi kangi”. ⁸Kasapasmi niikichita: Cristo samurkami, judiukunamanda allilla rurag kangapa; chasaka, Taita Dios ima nukanchipa ñugpamanda taitakunata niska tukungapa. Chiwami kawachirka, Taita Dios ima niskata sutipa rurag kagta. ⁹Mana judíu kagkunamandapasmi Cristo samurka. Paikunamandapasmi Taita Dios llakirirka; chasa iachaspaka, paita: “Kam, iapa suma atunmi kangi” ningapakuna. Chasallatami Cristomanda ñugpamanda librupi willaraiá, Taita Diusta kasa nispa:

Mana judíu kagkunapa chaugpipipas
 ningapami kaiki:

“Iapa suma atunmi kangi”.

Kamta suma atuniachispa kantangapami kaiki. ¹⁰Kasapasmi willaraiá: Kamkuna mana judíu kagkuna, Taita Dios agllaska runakunawa alli kuntintarispa iuiachiriichi.

¹¹Ikuti kasapasmi willaraiá:

Tukui kamkuna mana judíu kagkuna,
 atun Taita Diusta niichi:

“Kam, iapa suma atunmi kangi”.

Tukui alpapi kaugsagkuna,
 chasallata paita nisunchi. ¹²Ikuti Isaiaspas, kasami willarka: Isaí suti runapa iawarmandami tiagsamungapa ka, mana judíu kagkunatapas iaia mandag tukugsamungapa.

Paitami mana judíu kagkunapas suma iuiwai suiangapa kankuna.

¹³Taita Dios suma iuiwai suiangapa iuiachig, paillatata tukui kamkunata iuiachichu, paiwa suma iuiarispas, alli iuiachiiwa sumaglla kaugsanakungapa; chasaka, Santu Ispiritupa iapa iachaiwa paita imapipas suma iuiwai suiaspalla kaugsangapa.

¹⁴Nukapa taitakuna i mamakuna, nuka kamkunamandami allilla iuiani, tukuipi alli kaspas, allilla iachaiwa kagtakuna. *Chiwanka pudingichimi, kam kikinpura sumaglla iuiachinakuspa kaugsanakunga. ¹⁵Nuka chasa iuiaspapas, kai kartapi mana manchaspallami imakunamanda rimarkaikichita, kamkunata iuiachingapa. Taita Dios, iapa kuiawaspas, mingawaskamandami chasa rimarkaikichita; ¹⁶chasaka, Jesucristo ima niwaskata ruraspas, mana judíu kagkunata Taita Dios Alli Willaita karamuwaskata willangapa. Munakunimi,

mana judíu kagkunata Taita Diospa ñawipi sug kamarikutasina chaskiwangapa; chasaka paikuna, Santu Ispirituwa Taita Diospalla kangapakuna.

¹⁷Chimandami, Taita Dios ima munakuskata nuka ruraskamanda, Jesucristowa kaspá, iapa alli iuiachiiwa kani. ¹⁸Nuka kikinmandalla ñi imapas mana rimarinichu. Cristo kikinmi iuiachiwarka, nuka mana judíu kagkunata kaiangapa; chasaka paikunapas, Cristowa tukungapakuna. Chimandami nuka mana manchaspalla rimani. Rimaikunawa i ruraikunawa, ¹⁹mana imaurapas ruraska ujnachingasina kawachiikunawa, Santu Ispiritupa iapa iachaiwami mana judíu kagkunata kaiangapa iuiachiwarka. *Chiwanka, Jerusalemamanda kallaríspa, Iliria alpákama, tukuipimi Cristomanda Alli Willaita willaspa purirkani. ²⁰Chasa kagpipas, sugkuna willai kallariskapi, mana; chasapaka munakurkani, Cristopa sutita manara iachariska alpákunapi Alli Willaita willagringapa. ²¹Chasallatami ñugpamanda librupi willaraiá, kasa nísapa:

Paimanda ñi ima mana iachariska alpákunapimi
chi Alli Willaita uangapa kankuna.

Paimanda ñi imaurapas mana uiagkunami
iachagsamungapa kankuna.

Romama ringapa, San Pablo iuiakuskamanda

²²Chasa willai purikuspami, kamkunapagma ikuti ikuti chaiagringapa munakuspapas, mana pudirkani. ²³Ikuti kunaauraka, ñami kai alpákunapi puchukarkani willaspa puringapa. Ña achka watamandatami munakurkani, kamkunapagma chaiagringapa. ²⁴Chimandami iuiakuni, España suti alpama rikuspa, kamkunata kawaspa *ialigringapa. Kamkunapagma chaiagriura, iapa allimi iuiachiwangapa ka. Kamkunaka, ima ministiskami karawankangichi, nuka Españama chaiagringapa. ²⁵Kunaauraka, Jerusalemami rikuni, Taita Diospalla kagkunata mailla kulkiwa aidagringapa. ²⁶Masedonia i Akaia alpákunapi kaugsaspa Cristowa tukuskakunaka munanakurkami, kulki tandachispa, Jerusalem kachangapa; chitaka, mana ñi ima iukaska Taita Diospalla kagkunata karangapa. ²⁷Paikunapa iuiailawami chasa aidangapa munarkakuna. Paikunatami chaiarka, chasa aidangapa. Taita Dios judiukunata Alli Willaita karamuskata chi mana judíu kagkuna chaskiskamandaka, iukankunami judiukunata ima ministiskakunata aidangakuna. ²⁸Chimanda, chi tandachiska kulkita Jerusalemipi kaugsanakuskata nuka karagringapa puchukauraka, Españama rikuspa, kamkunapagpi iaiuspami *ialigrisa. ²⁹Kasami iachani: kamkunapagma nuka chaiagriura, Cristomi nukanchita mas suma kuiangapa ka.

³⁰Taitakuna i mamakuna, nukanchipa Iaia Jesucristomanda i Santu Ispíritu karamuska kuiaimandami mañaikichita: nukamanda Taita Diusta suma mañaspa aidawaichi. ³¹Mañapuaichi, Judea alpapi kaugsaspa Cristota mana uiagkunamanda Taita Dios michawachu. Chasallata mañapuaichi, Taita Diospalla kagkunaka, Jerusalemipi nuka apakuska kulkita sumaglla mana piñarispalla

chaskiwachukuna. ³²*Chiwanka, Taita Dius munagpika, kamkunapagma alli iuiachiwa chaiagrispa, kamkunawa allilla samarigringapa mañapuaichi. ³³Taita Dius sumaglla kaugsaita karag, tukui kamkunawa kapuachu. Chasa kachu.

San Pablo rigsiskakunata: “Puangi” niskamanda

16 ¹Nukanchipa mama pani Febeta allilla chaskipuaichi. Paika, Senkrea puiblupi Cristowa tukuskakunata aidagmi ka. ²Imasami chaiá, Taita Diuspalla kagkunata chaskingapa: chasallata paitapas chaskipuaichi, Iaia Jesusta iuiarispá. Chi panika, achkakunata i nukatapas aidagmi ka. Allilla ruraskamanda, paita ima ministiskata karapuaichi.

³Pani Priskata i paipa kusa Akilata: “Puangi” nipuaichi. Paikunapas, nukawa Jesucristomanda Alli Willaita willagkunami kankuna. ⁴Paikuna, nukamanda asllamandallami kispirkakuna wañungapa. Chimanda paikunata, nukalla mana “Pai Siñur” ninichu. Tukui mana judiukuna, Cristowa tukuspa, maipi kagkunapasmi, “Pai Siñur” ninakú. ⁵Priska i Akilapa wasipi Cristowa tukuskakuna sugllapi tandariskakunatapas: “Puangi” nipuaichi.

Nukapa *kuiaska waugki Epenetotapas: “Puangi” nipuaichi. Paika, Asia alpapi tukuikunamanda ñugpa Cristowa tukuskami ka.

⁶Pani Mariatapas: “Puangi” nipuaichi. Paika, kamkunapuramanda achka allillami rurarka.

⁷Nukapa alpamanda nukawa wichkaraiaskapi kaska waugki Andronikota i Juniastapas: “Puangi” nipuaichi. Paikunamandaka, Jesús kikin kachaska runakunami ninkuna: “Iapa allimi kankuna”. Nukamanda mas ñugpami Cristowa tukuska kankuna.

⁸Iaia Jesuswa suma iuiarig kagmanda, nukapa *kuiaska waugki Ampliatotapas: “Puangi” nipuaichi. ⁹Waugki Urbano, nukanchiwa Cristomanda Alli Willaita willagtapas: “Puangi” nipuaichi. Nukapa *kuiaska waugki Estakistapas: “Puangi” nipuaichi. ¹⁰Waugki Apeles, Cristowa suma iuiarig kagta kawachirigtapas: “Puangi” nipuaichi. Waugki Aristobulopa wasipi kaugsanakuskatapas: “Puangi” nipuaichi. ¹¹Nukapa alpamanda kaska waugki Erodiontapas: “Puangi” nipuaichi. Waugki Narsisopa wasipi Iaia Jesuswa suma iuiarigkunatapas: “Puangi” nipuaichi. ¹²Pani Trifenata i pani Trifosatapas: “Puangi” nipuaichi. Paikunapas, Iaia Jesusmanda allilla ruragkunami kankuna. Nukapa *kuiaska pani Persidatapas: “Puangi” nipuaichi. Paika, Iaia Jesusmanda iapa sinchi ruragmi ka. ¹³Iaia Jesús agllaska waugki Rufota i paipa mamatapas: “Puangi” nipuaichi. Paipa mamaka, nukapa mamasinami kapuá. ¹⁴Waugki Asinkritota, waugki Flegonteta, waugki Ermesta, waugki Patrobasta, waugki Ermasta i tukui paikunawa waugkikunatapas: “Puangi” nipuaichi. ¹⁵Waugki Filologota i pani Juliata, waugki Nereota i paipa panita, waugki Olimpasta i tukui paikunawa Taita Diuspalla kagkunatapas: “Puangi” nipuaichi.

¹⁶Kam kikipura Taita Diosmanda iuiarispá, “Puangi” muchanakuspa ninakuichi. Cristowa tukuskakuna maipi kagkunapas, tukuikunami kamkunata: “Puangi” ninakú.

¹⁷Kam taita i mamakunata mañaikichitami: maikankunapas Cristowa tukuskakunata iskaima tukungapa piñachirinakuspa pandachigkuna kaskata kawapuaichi. Chasa pandachigkunaka, kamkuna Alli Willaita iachaikuskata tuntiachigsinami ruranakú. Paikuna kaskamanda anchuriichi. ¹⁸Chasa ruragkunaka, nukanchipa Iaia Cristo imasa munakuskasina mana ruranakunchu. Pai kikipura iuiarispá munaskakunallatami ruranakú. Paikunapa miski simiwa, suma rimaiwami maikan manara allilla iachagkunapa iuiaita tuntiachinakú.

¹⁹Kamkunaka Cristo ima niskata ruragkuna kagta, tukuikunami iachanchi. Chimandami kamkunamanda, nuka iapa alli kuntintulla kani. Kamkuna chasa kagpipas, munanimi, kamkuna iachakunasina mas suma ruraikunata agllaspa kangapa. Ikuti jiru rurangapaka, mana iachagsina kaichi. ²⁰Taita Dios, kamkunata sumaglla kaugsaita karag, mana unallami iaia kukuta kamkunapa chaki sarudiru ukuma pambangapa ka. Nukanchipa Iaia Jesús, kamkunata sumaglla kawapuachu.

²¹Waugki Timoteo, nukawa Alli Willaita willagmi kamkunata: “Puangi” niku. Nukapa alpamanda kaska waugikikuna Lusio, Jasón i Sosipaterpasmi, “Puangi” ninakú.

²²Nuka kikin Tersio, kai kartata Pablomanda iskribig, Iaia Jesusta iuiarispami, “Puangi” niikichita.

²³Waugki Gaiomi kamkunata: “Puangi” niku. Paipa wasipimi nuka Pablo kaugsakuni. Tukui Cristowa tukuskakunapasmi kaipi tandarinkuna. Waugki Erasto kai puiblupi kulki wakachigpasmi, “Puangi” niku. Waugki Kuartopasmi “Puangi” niku.

²⁴[Nukanchipa Iaia Jesús, tukui kamkunata sumaglla kawapuachu. Chasa kachu.]

Taita Diusta iapa suma atun kagta nispa, puchukariskamanda

²⁵Taita Diusta nisunchi, iapa suma atun kagta. Paimi pudí, kamkunata tukuipi allilla charingapa. Chasallatami nuka, Jesucristomanda Alli Willaita iachachispa willani. Chi Willaita, kai alpa manara tiagsamuskauramandata, mana pipas iachaska kaskatami. ²⁶Taita Dios, pailla iachaskata kunaaura willangapa kachamurka. Ñugpamandata Santu Ispirituwa rimagkuna iskribiraiaskapipas, chi Willaita willaskami tiarka. Taita Dios kikin mana wañugmi chasa willangapa kachamurka; tukui kai alpapi kaugsagkunaka, chi Willaita iachaspa, suma iuiarispá, Taita Dios ima niskata ruraspa kaugsangapa.

²⁷Taita Dios suglla tukui iachagta Jesucristowa nisunchi: “Kam, iapa suma atunmi kangí, maituku waranga waranga watakuna *ialigpipas”. Chasa kachu.